

In djardin au trwèsième

comédie en 3 actes

d'Albert Scohy

Distribution

| | | |
|-------------|--------------------|--|
| Mimy | esthéticienne | <i>femme élégante et raffinée, tout lui réussit</i> |
| Lily | diététicienne | <i>moins de personnalité, plutôt "bien en chair"</i> |
| Julien | concierge | <i>dévoué mais curieux, veuf</i> |
| Maurice | facteur | <i>brave et dévoué, célibataire</i> |
| André | boucher | <i>brave et dévoué, marié</i> |
| Mr Lecompte | contrôleur du fisc | <i>à cheval sur les principes</i> |
| Michou | décorateur | <i>homosexuel affirmé, légèrement maniéré</i> |
| Clément | ex de Mimy | <i>a séjourné à l'étranger pour son travail</i> |
| Ernest | nouvel engagé | <i>bourru, autoritaire, ... mystérieux</i> |

Action

Mimy attend la visite d'un décorateur afin de rénover l'appartement qu'elle occupe et où elle héberge sa copine Lily. Elle compte aussi engager un secrétaire et une servante. Mais c'est son ex et un contrôleur des contributions qui se présentent.

En son absence, c'est Lily qui les reçoit. Et comme elle n'est pas très déleurée, on imagine la suite.

Tirades

| | | | | |
|-------------|-----|-----|-----|------|
| Mimy | 82 | 69 | 54 | 205 |
| Lily | 83 | 55 | 49 | 187 |
| Julien | 40 | 35 | 29 | 104 |
| Maurice | 25 | 0 | 28 | 53 |
| André | 10 | 0 | 8 | 18 |
| Mr Lecompte | 36 | 57 | 83 | 176 |
| Michou | 4 | 13 | 14 | 31 |
| Clément | 35 | 37 | 78 | 150 |
| Ernest | 16 | 43 | 49 | 108 |
| | 331 | 309 | 392 | 1032 |

Décor

L'action se passe dans l'appartement de Mimy, situé au 3^e étage.

- Au 1^{er} acte, la scène représente un petit salon dans lequel Mimy a installé son bureau.

Sur le bureau, un téléphone. Lors des communications téléphoniques, on entend la voix du correspondant.

- Aux 2^e et 3^e actes, le salon est transformé en bureau-jardin : plantes et fleurs, tissus fleuris... On doit y retrouver le style et la personnalité de Michou, le décorateur.

A droite (D) une porte s'ouvre sur le palier d'entrée et l'escalier de l'immeuble

A gauche (G) une porte donne sur les autres pièces de l'appartement (cuisine, chambres...)

Acte 1

un jour de semaine, en été, dans la matinée

Scène 1 : Mimy, Lily

elles entrent à G. Lily pleure

Mim Alons Lily, arêtez d'toudis brère insi !... El solèye lût, lès oujas tchant'tè, l'viye èst bèle !

Lil C'est facile à dire !... Tout vos réyussit toudis, vous !... Vos avez comincé ave in magasin d'parfums...

Mim Et mètnant dj'ai in salon d'biaté èyè n'boutique d'abîymints... Djè coneus l'refrin, vos mè l'répétez tous lès djous.

Lil Et mi, pindant c'temps-là, djè tés n'maison d'rèjime qui n'vind quasimint ré.

Mim Quand dj'ai ouvri l'boutique, dj'ai volu vos l'yî l'salon, mais vos n'avez né volu.

Lil Comint volez t'ni in salon d'biaté quand on è-st-atifèye come mi ! *elle pleure*

Mim Vos alez co r'cominci ?... Què c'què vos avez d'mwins qu'in ôte ?

Lil C'est putôt d'pus q'dj'aureus !... *pleure*

Mim Bé seûr, pou l'patrone d'ène maison d'rèjime, vos n'faijez n' vos publicité !

Lil *pleure* Vos wyez bé q'vos d'sez co què dj'sus grosse !

Mim *prenant le parti d'en rire* Mais non fait, djè n'ai né dit ça !

Lil Djè n'in peus ré !... In coup qu'i gn'a n'saqwè qui n'va né, i faut què dj'mindje *met un bonbon en bouche et le fera chaque fois que ce sera possible*

Mim Vos alez fé vos tch'feus èt vos maquiuyî come i faut... Et vos irez vos ach'ter saquants robes à l'mode, ça dira d'djà mieus.

Lil Djè n'sus né bé abiyê insi ?... Disez q'djè nè r'chène à ré, tant q'vos i-èstèz ! *pleure*

Mim Gn'a tout d'min.me moyé d'fé mieus !... C'èst come vos magasin : vos d'vrîz l'modèrniser !... Vos arindjez l'façade, vos i trouvez in nom orijinal...

Scène 2 : Mimy, Lily, Julien

Jul *entre à D* Bondjou mès p'tite fiyes !... Djè vos aporte vos corèspondance.

Mim In v'là iun, tènèz, d'orijinal !... Faijez come à vos maison, messieu Julien : intrez sans soner !

Jul Ah bé c'èst c'què dj'ai fait !... Qué nouvèles, mam'zèle Lily ?... I m'chène què vos stez bé djoliye audjourdû !

Lil *pleure* In v'là co iun qui s'fout d'mi !

Jul *à Mimy* Dj'ai dit n'saqwè qu'i n'faleut né ?

Mim Vos avez mis les pièds dins l'plat, come d'abitûde !

Jul *pour se reprendre* V'là dès env'lopes pour vous... Dj'ai dit au factèur què dj'aleus vos lès doner... Djè m'méfiye ène miète dè li, ave tout c'qu'on raconte dèssus s'dos.

Mim Ah bé mi djè trouve què Maurice èst bé djinti !... Quand i wèt qu'i gn'a n'saqwè dè spécial, i monte lès trwès étâdjès pou mè l'doner !...

Jul Quand djè pinse qu'on a oblidjé n'masse dè djins à mète ène bwète aus lètes à t'chmin pou què l'facteûr èn'pièrde pwins d'temps !... I nè l'f'reut né petète si vos èstîz n'vièye djon.ne fiye !

Mim *à Lily qui pleure toujours* Disez Lily, vos allez co brère longtemps ?

Jul Crwèyez bé, savez mam'zèle Lily, què dj'n'ai né volu dire du mau d'vos twèlète ! Au contraire, djè vos trouve foûrt djoliye !... Mais vos stez foûrt djoliye ètout, savez mam'zèle Mimy !

Mim Estez bé seûr què c'est pou impèrchî l'facteûr dè monter q'vos nos apotez nos corèspandance ?

Jul Oui... Oui...

Mim C'n'est né pou v'ni nos vire ?

Jul Non... Non...

Mim Ca n'vos fait né plaisi d'veni nos vire ?

Jul Siè... Siè. ...

Mim Vos stez djalous quand i d'a d's'ôtes qui vièn'tè nos dire bondjou !

Jul Non... Non...

Mim Mais vos survèyez quand min.me tous lès cés qui mont'tè au trwèsième étâdje !

Jul In bon concièrje deut iète au courant dè c'qu'i s'passe dins l'batimint... Et puis, deûs djon.nès feumes toutes seules...

Mim Ah mais n'euchîz né peu, nos savons nos dèsfinde... Nos avons du caractère !... Eno Lily !

Lil *pleure de plus belle* Ah oui !...

Jul Alons mam'zèle Lily, vos n'alez né co vos r'mète à brère !... C'est pou c'què dj'vos ai dit 't-à-l'eûre ?

Mim Mais non, Lily à dès p'tits problèmes !... Ca peut ariver à tètous !

Lil *pleure* Ele m'a dit q'dj'èsteus in arièrèye, mau abiyê...

Jul Ah mais c'n'est né vrai, savez çoulà !

Lil *pleure* Et en plus, èlle a ajouté q'dj'èsteus trop grosse *met un bonbon en bouche*

Jul A part ça, tout va bé ?

Mim Tout va bé, messieû Julien !... I gn'a min.me du nouvîa q'vos n'savez né co...

Jul Què djè n'sais né co ?... *on sonne*

Scène 3 : Mimy, Lily, Julien, Maurice

Mau *entre à D* Bondjou lès fiyes, c'est Maurice, vos p'tit facteûr !

Jul Què v'nez fé roci, vous ?

Mau El facteûr apote èle corèspandance.

Jul Vos n'm'avîz né tout doné ?

Mau Couçi, c'è-st-in r'comandé !... Djè deûs lè r'mète en min prope ! *Signer accusé réception*

Jul Vos n'povîz mau d'mè l'dire !... Faura q'djè vos survèye dè tout près, djon.ne ome !

Mim En'fajez né atinçion, savez Maurice !... I s'prind pou l'survèyant jénéral du batimint ! Volez n'pètite jate dè café ?

Mau *faussement* Non merci, n'vos dèrindjez né...

Lil Volez n'pètite goutte ?
Mau *plus intéressé* Ah si vos d'avez ieune sous la min !
Lil Vènez, djè va in bwère ieune ave vous pou mè r'monter l'moral !
Mim Donc messieû Julien, djè vos causeus d'ène saqwè d'nouvua q'vos n'savez né co...
Dj'ai décidé d'fé dès travaus !... Djè va fé in buraû djardin !
Jul In buraû djardin ?
Mim Quand dj'èsteus p'tite, dj'ai toudis rèvé d'awè in bia grand djardin rimpli d'arbes !
Jul Vos alez planter dès arbes roci ?
Mau Qu'il èst bièsse, èm'n'ome !
Jul Qu'avez dit, vous ?
Mau Qui èst-c'èm'n'ome, rola su l'étiquète ?
Mim Djè va mète dès fleurs èt dè l'vèrdure pa tout costé.
Lil *pleure* Là-d'sus, gn'aura pus pwins d'place pour mi !
Mim Alons Lily !... Vos m'avez d'mandé d'vos lodjî pou quinze djous èyè v'là trwès ans
q'vos stez ci !
Mau Mam'zèle Lily, djè n'vos lèyrai né tchèyi !... In viè djon.ne ome come mi n'a né
dandjî d'bran.mint dès places... Si vos volez, dj'ai n'tchambe pour vous !
Jul Mam'zèle Lily, dèpuis l'dispariçion dè m'feume, èm' n'apartemint èst dèv'nu trop
grand !... Vos i trouv'rez l'apais'mint qu'in ome meûr èyè sérieux peut vos doner .
Mim Vos wyez qu'i g'na co dès djins qui ont bon keûr !... Alez, il èst temps què d'j veuche
djusqu'au salon pou vire si tout va bé !... Lily, n'oubliez né q'dj'ai deûs rendez-
vous : èle nouvèle mèskène à onze eûres èyè l'décorateûr à onze eûres èt d'mi !...
Mais normalemint, djè s'rai r'vènu... Vènez ave mi, messieû Julien, vos m'tèrez
compagniye dins lès scayîs !
Jul Èyè l'facteûr, i n's'in va né li ?... Et après on dira co què l'tournèye n'avance né !...
Mim Ah dj'oubliez... Dj'ai mis in anonce su Internet pou ingadjî in secrétaire. Si gn'a
n'saqui qui téléphone, disez-i d'vèni après-midi... Vos v'nez messieû Julien ? *Sortent
à D*

Scène 4 : Lily, Maurice

Mau Mimy a co l'air en plène forme audjourdû !
Lil Elle èst toudis insi !... Tout i rèyussit toudis, lèye !... Tandis q'mi dj'ai dès misères
tant qu'on in veut.
Mau Et ele nè veut né vos doner in coup dm'in ?
Lil Siè !... C'èst mi qui n'veut né... Djè n'mè sins né capabe dè rèyussi come lèye...
Em'wèyez t'ni n'boutique d'bîymints, vous ?
Mau Pouqwè né ?... I d'a dès ciènes qui sont co pus mau faites què vous, savez !
Lil *elle sourit* Qui sont co pus mau faites ?
Mau Ah mais c'n'èst né c'què dj'voleus dire... Au contraire, djè vos trouve foûrt bé
mise... Vos avez dès tch'feus... in visadje... ène robe...
Lil *rit franchement* Co eûreûs q'dj'ai tout ça, sinon bé ça direut mau !
Mau Oui, enfin djè veus dire...
Lil En'vos tracassez né, Maurice... Djè sais bé q'vos n'estez né méchant pou in sou !

Mau Dins tous lès cas, dj' aime mieus vos vire rire... Ele grimace èst pus bèle !
Lil Volez co n'pètte goute ?
Mau Si ça peut vos r'monter l'moral, djè veus bé !

Scène 5 : Lily, Maurice, André, (Clément : off – au téléphone)

And *sonne et entre* Bondjou m'pètit lapin !... Ah vos stez là, facteur ?
Mau Oui !... Ca vos dèrindje ?
And Né du tout !... Djè vés apporter l'viande à mam'zèle Lily come tous lès djours !
Mau C'èst pou ça q'vos l'ap'lez "m'pètit lapin" ?
And Ca, c'èst pac'què djè l'wès voltî !... Eyè vous, què v'nez fé roci ?
Mau El facteur, messieû, aporte èle corèspandance en mins propes.
And Eyè l'boutchî, messieû, lîve à domicile !
Lil Disons q'vos avez bon keûr tous lès deûs èt n'in causons pus ! *le téléphone sonne*
Allo ?...
Clé *off* Bonjour madame... Djè vos téléphone pou l'anonce.
Lil Pou l'anonce ?... Quél-anonce, hon ?
Clé Su Internet !... Ele place dè secrétaire.
Lil Ah oui ça i èst, dj'i sus...
Clé Ca m'intèrèsse... Ec'què vos pourîz mè r'cèvwèr...
Lil Djè n'sais né, mi...
Clé Vos wèrez, dj'ai tout c'qui faut pou fé in bon secrétaire !
Lil Djè n'in doute né... Mais gn'a d'djà n'masse dè rendez-vous su l'coup d'onze eûres.
Clé Djè sus seûr què quand vos m'aurez vu...
Lil Oui, bé vos n'avez qu'à v'ni à c'n'eûre-là ètout...
Clé C'èst bé djinti !... Vos wèrez, vos n'lè r'grèt'rez né !... A t'à-l'eûre !
Lil Oui, c'èst ça... Arvwèr !
Mau Què c'què vos causîz d'secrétaire ?
Lil C'èst Mimy qui veut d'ingadjî iun !... Ele n'in sort pus toute seûle pou fé tous sès papîs.
Mau Ca m'convéreur bé, mi, n'place dè secrétaire !
And Djè pinseus djustemint l'min.me !
Lil C'coup-ci, vos d'sez dès bièstrîyes, savez ... Tant q'vos stez là, èc'qui d'a iun d'vous deûs qu'aureut bé dîs minutes pou v'ni ave mi dins m'tchambe ?
Les 2 Mi !
Mau Ave mi, vos s'rez bé binaise !... Faut vire ave qué délicatèsse djè gliche lès lètes dins lès bwètes aus lètes !
And Ave mi, vos s'rez co pus binaise !... Faut vire ave qué douceûr djè manipule lès bias boukèts !
Lil Vos stez telemint délicats qu'i faudra bé vos i mète à deûs !... Alez, chuvez-m' !
sortent à G

Scène 6 : Mimy, Maurice, André, Lily

- Mim *entre à D et se met à son bureau. On entend Lily rire de bon coeur...*
C'est Lily qui rit insi ?... A m'n'avis, dj'aurai révè... *rires* C'est l'premi coup d'puis
longtemps què dj'l'intind rire insi. *Rires*
- Mau *entre à G en se tenant le dos* Djè sus bé seûr què dj'ai atrapé in tour dè reins à
voulwèr' èle porter !... *sort à D*
- Mim C'è-st-ave l'facteûr què Lily aveut ôstant d'plaisi ?... Et bé ç't'èllà !... *rires* Co
toudis ?... Ca va Lily ?...
- And *entre à G* Elle arive, èlle è-st-in route à r'mète sès loques !
- Mim A r'mète sès loques ?... El facteûr èyè l'boutchî ?...
- Lil *entre à G en riant* Il a falu qu'is s'i mètè à deûs !... Et on apèle ça dè omes !
- Mim Djè sus bé binaise dè vos intinde rire, mais quand min.me...
- Lil Djè d'aveus m'soù d'travèrsî l'coridor pou daler què mè loques !... Djè ieus ai fait
mète èm'garde-robès dins m'tchambe, insi ça s'ra pus aijîle !
- Mim Ah c'est ça q'vos f'jîz ?... *on sonne* Mon Dieur, dèdjà onze eûres !... Ca deut iète
èle nouvèle mèskène... Faijez-l'ratinde tant q'djè va passer in coup d'peigne dins mè
tchfeus !... *sort à G*

Scène 7 : Lily, Clément, Mimy

- Lil *ouvre à D et sans regarder...* Intrez madame.
- Clé *entre à D* Bondjou madame.
- Lil Mais vos n'estez né madame !
- Clé En effet !... Mais vous non pus, vos n'estez né madame.
- Lil Ah ça, djè peus vos asseurer q'dj'ai tout c'qu'i faut !
- Clé Djè n'in doute né !... Mais vos n'estez né l'feume què dj'm'atindeus à vire.
- Lil Vous non pus, mais ça n'fait ré... *à part* Ca n'f'ra pwins d'tort dè s'fé chèrvi pa in
ome.... Djè va dire à l'patrone què vos stez là !... *sort à G*
- Clé Ele patronne !... Ca m'fait tout drole à l'idèye dè lè r'vire après cinq ans ! *Il tourne le
dos à la porte de G*
- Mim *entre à G* Djè su-st-à vous madame... Oh pardon !... *Clément se retourne*
Clément ?... Vos stez r'vènu ?
- Clé Come vos wyez !... Eyè c'coup-ci, djè n'm'in r'va pus !
- Mim Et comint m'avez r'trouvé ?
- Clé Quand dj'ai vu q'vos d'mandîz in secrétaire, dj'ai téléphoné ... Et vos mèskène m'a dit
què dj'poveus v'ni à onze eûres !
- Mim Em'mèskène ? *Riant de bon coeur* Si èle vos intindeut !... Mimy n'èst né
m'mèskène, c'è-st-ène camarade qui lodje ave mi !
- Clé Ah bon ? ... Et bé djè l'ai pris pou vos mèskène.
- Mim Mais lèye ètout vos a pris pou m'mèskène !... Figurez-vous q'dj'aveus djustemeint
rendez-vous ave n'nouvèle mèskène qui v'neut s'présinter...
- Clé Et mi qui s'dèmandeus comint c'què vos alîz mè r'cèvwèr !

Mim C'est vrai q'dèpuis cinq ans, vos n'm'avez né doné in seûl coup d'téléfone, né d'djà in tout p'tit mèssâdje !
 Clé Dj'ai n'masse travayé !
 Mim Et vos n'avez né pinsé à mi !...Mi ètout, dj'ai n'masse travayé !... A tél pwins q'djè n'in sors pus...
 Clé Si vos volez, djè s'rai vos secrétaire !
 Mim Secrétaire ?... C'n'est né assez bia pour vous !
 Clé Et bé d'aboûrd, vos n'avez qu'à m'nomer directeur !
 Mim C'est ça !... Et mi djè n'aurai pus ré à dire !
 Clé Vos s'rez m'directeur jénéral !
 Mim Ca, c'è-st-ène bone idèye !... Djè s'rai vos directeur èt vos jénéral ! *On sonne* Mon Dieu, c'est petète èl décorateur qui vét pou lès travaux... *crie* Lily !... Lily !
 Clé Djè m'in va pou vos lyî tranquîye...
 Mim Non fait, demeurez... Ele n'aura qu'à l'fé ratinde... *on sonne* Surtout qu'il a l'air prèssé !
 Lil *entre à G* Qui c'qui sone insi, hon ?
 Mim Ca deut iète èl décorateur !... Alez ouvri l'uche !
 Lil Ah bé l'nouvèle mèskène n'a qu'à cominci s'service tout d'suite !
 Mim Euh ... Non... I faut co qu'on cause ène miète... Vènez ave mi Clé... messieû...
sortent à G – on sonne

Scène 8 : Lily, Lecompte

 Lil S'il èst si prèssé pou fé lès travaux, ça va daler rade ! *Ouvre à D*
 Lec *entre à D* Bondjou madame !... C'est bé roci l'maison d'Lily Castaigne ?
 Lil *surprise* Euh... Oui... C'est roci !
 Lec Djè voureus bé i causer !
 Lil Djè vos ascoute.
 Lec Mais non madame !... Djè veus causer à Lily Castaigne ! ... Alez l'quer !
 Lil Ah bon !... *à part* Vaut mieus n'né l'contraryî !... *sort à G* Mam'zèle Lily !... Mam'zèle Lily !...
 Lec In controleûr dès contribuçons, ça deut s'fé respecter !... El cé qu'èsteut avant mi steut en fin d'carière !... Ave mi, ça va candjî !... Is vont aprinde à m'conaite !
Tourne le dos à la porte de G
 Lil *entre à G en se moquant* Bondjou monsieur, vos m'avez fait d'mander ?
 Lec Bondjou madame !... Dj'ai saquants questions à vos poser !... *se retourne* Co toudis vous ?... Vos vos foutez d'mi ?... Djè vos ai d'mandé d'ap'ler Lily Castaigne !
 Lil Et bé Lily, c'est mi !
 Lec Vos n'povîz né l'dire pus timpe ?... Djè n'ai pwins d'temps à pièrde, savez mi !... Et mètnant, lèyez-m'causer sans m'aréter !
 Lil Mais què c'est d'ça pou iun ?
 Lec V'là !... Dj'ai fait in plan !
 Lil Dédjà ?... Sans ré m'surer ?...

Lec *rire sadique* Sans ré m'surer ?... Ca fait pus d'quinze djous q'djè m'sure dins tous les sins !... V'la m'plan d'remboursemint !

Lil *a du plaisir* Mais djè n'vos ai ré d'mandé, mi !

Lec Mais mi djè sus v'nu vos d'mander dès comptes !... Pus'qu'on avance èt mwins'què vos gagnez !... Ca n'est né normal !

Lil Mais què c'qu'in décorateûr a à vire ave mès r'vènus ?... Ah oui !... Vos vos d'mandez petète si dj'saurai payî lès travaux ?... *riant* C'n'est né mi qui lès a comandé, c'est Mimy !

Lec Mimy ?... Qué Mimy, hon ?

Lil Djè va vos spliqui... Djè m'apèle Lily èt djè vique ave in ôte feume qui s'apèle Mimy !

Lec *comprend de travers* Vos viquez ave in ôte feume ?

Lil Ca fait trwès ans q'nos stons achène.

Lec Què vos stez achène ?

Lil Mimy est foûrt ocupèye ave sès affaires... C'est n'miète lèye l'ome de l'maison. Mi, djè sus come on direut... èle mèskène !

Lec Ene mèskène qui n'est né déclarèye !...

Lil Mais n'vos in f'jez né, èle vos pay'ra facilèmint !... Ave s'boutique d'abîymints, ès-salon d'biaté èyè bé rade ès colèccion d'bijous, èle nè peut mau !

Lec Ele fait bran.mint d'bénéfices ?

Lil A l'èscoupe, hin vous !

Lec Djè suppose qu'èle travaye ave dès abonemints ?

Lil Oficièlemint, oui !

Lec Oficièlemint, d'sez ?

Lil Bé oui, à costé dès abonemints, i gn'a tout l'rèsse...

Lec C'est du nwèr ?

Lil Bé oui !... Gn'a dès swins qu'èle nè déclare né aus contribuçons, insi èle les fait payî mwins tchèr !... Tout l'monde s'i r'trouve !

Lec Tout l'monde s'i r'trouve, en èfèt !...

Lil Alez, assez tchafié !... Djè va l'quer !... Ele va iète bé binaise de vos vire... *sort à G*

Lec Eyè mi qui va iète bé bianise de l'vire !... Résumons... In min.nâdje qui n'd'est né iun... Ene feume, Lily, qui gagne de mwins en mwins,.. In ôte, Mimy, qui gagne de pus en pus... Mais en nwèr' !... Dès travaux qu'on va fé... I faut q'djè survèye ça d'tout près !

Scène 9 : Lecompte, Mimy, Lily, Clément

Mim *entre à G* Bondjou messieû !

Lec Bondjou mam'zèle... ou madame, enfin... Djè n'sais né c'què d'deûs dire.

Mim Scusez-m'dè vos awè fé ratinde.

Lec Ca n'm'a né ch'nu long !... Dj'ia ieu de l'conversâcion !

Mim Ave Lily, gn'a pwins d'imbaras !... Dj'espère qu'èle nè vos a né dit trop d'bièstrîyes !

Lec Vos ap'lez ça dès bièstrîyes, vous ?

Lil *entre à G avec Clément* Vènez ave nous, pou discuter ave in décorateûr, ça n’f’ra pwins d’tort d’awè in ome ave nous... *à Lecompte* Djè vos présinte èle nouvèle mèskène !

Clé Mais enfin djè n’sus né l’...

Mim *jouant le jeu* Mais siè, puisquè Lily dit q’vos stez nos mèskène...

Lec Ene nouvèle mèskène !... Tènez, tènez, tènez !... Insi, vos estez au service, messieû ?

Clé Oui... C’est tout nouvia !... Ca vét d’sorti !...

Mim Alors, messieû, pa qwè d’alones cominci ?... Lès tchambes ou l’buraû ?

Lec Lès tchambes ?... Ah oui, lès travaûs... Come vos vourez....

Mim Djè va toudis vos spliquî... Roci, djè veus fé in burau. Mais i faut què m’buraû r’chène à in djardin.

Lec In djardin ?... Au trwèsième étâdje ?

Mim Pou çoulà, i faut transformer m’tchambe en salon.

Lil Sinon, èlle aura in burau èt in djardin mais pus pwins d’salon.

Mim Come i gn’a deûs tchambes, ça n’est né compliqué.

Lil Vos wardez n’tchambe, vos f’jez in salon dins l’ôte, in djardin ave l’salon èt vos i mètez l’buraû ! C’est simpe !

Lec *ne comprend pas* C’est simpe, en èfèt !... *revient sur terre* Mais ça risque dè couster tchèr !

Lil Bah, ça n’vét né à saquants mille euro !

Lec A m’n’avis, ça s’ra dès dizaines dè mille !

Lil Ca n’fait ré, s’i faut èlle augmint’ra sès pris.

Mim Lily, arètez d’raconter dès bièstrîyes !... Alez putot nos quer in p’tit vère !

Lil In p’tit vère ?... Bé l’mèskène èst là pou l’fé !

Clé Mais enfin, djè n’sus né...

Mim I n’est né co assez abitwè pou l’fé... Alez, Lily, chèrvez-nous in p’tit vère !... *on sonne* Ou putot non, allez ouvri l’uche !

Lil I faut iète abitwè pou daler ouvri l’uche ètout, djè suppose !

Mim Vènez, messieû, nos irons vire lès tchambes en ratindant... *à Clément* Vènez ave nous ètout... euh...

Clé Clément, mam’zèle !

Mim Vènez ave nous, Clément ! *Sortent à G*

Lil Em’dirîrz bé à qwè c’què ça chèrt d’awè n’mèskène si èle nè va né ouvri l’uche quand on sone ! *Elle ouvre à D et sèchement* Intrez !

Ern Bondjou madame, dj’ai rendez-vous !

Lil Co toudis ?... Djè n’sais né si on saura s’ocuper d’vous audjourdû, savez.

Ern Djè sus v’nu pou l’anonce !

Lil L’anonce ?... Ah oui !... *le regarde de plus près* I n’a né foûrt bèl air pou fé in secrétaire !... Enfin !... Djè va dire què vos stez là ! *Sort à G*

Clé *entre à G et croise Lily* Djè n’ai jamais vu in bérjot parèye !... Cinq minutes dè pus èt djè fais in maleûr !

Ern Bondjou messieû, djè sus v’nu pou l’anonce !

Clé Mi ètout, dj’èsteus v’nu pou l’anonce... *souriant* Enfin si on peut dire...

Ern Ah vous ètout ?... Et vos in-dalez pac'qu'on n'veut né d'vous ?

Clé Né du tout !... *souriant* Au contraire, djè pinse què djè peus conv'ni.

Ern Bé d'abourd, si l'place èst prise, djè m'in va.

Clé Non, n'partez né insi... Ratindez d'vire èle patrone, c'èst lèye qui décide !

Mim *entre à G avec Lecompte et Lily* Alez, à l'ouvrâdje !... Gn'a pus qu'à fé lès plans èyè l'devis... *voyant Ernest* Ah djè vos aveus roublié, vous !... Bondjou messieû, nos avines rendez-vous, djè pinse...

Ern Ca n'a pus pwins d'importance !... Messieû m'a tout spliqué... Merci quand min.me.

Mim Mais què c'què vos racontez ?

Ern Messieû m'a dit què l'place èsteut prise.

Clé Messieû v'neut pou l'anonce... *souriant* come mi !... Djè i ai dit q'dj'èsteus arivé l'premî... Mais q'c'èsteut à vous d'décider !

Mim Ah bé dj'l'èspère bé !... C'èst quand min.me mi l'patrone dè l'maison !

Lec *timidement* Disez, vos n'aurîz né in mète à m'prèster ?

Clé In mète ?... Pou qwè fé, hon ?

Lec Pou fé lès plans, i faut m'surer !... Et pou m'surer i faut in mète !

Clé In décorateûr qui vét sans mète !... On aura tout vu !

Mim Lily, allez i quer in mète èt qu'on n'in cause pus ! *Lily sort à G*

Clé I faudra petète qu'on dèssine lès plans à s'place !

Mim Oh vous, n'compliquez né tout !... Contintez-vous d'iète èle mèskène èt taisez-vous !

Ern D'abourd, djè n'ai pus ré à fé roci... Arvwèr madame !

Mim Què d'sez, vous ?... Ah oui, nos avines rendez-vous !

Ern Dj'èsteus v'nu présinter mès sèrvices, mais s'il èst trop tard...

Mim Mais non, nos n'avons né d'djà ieu l'temps d'causer !... Avez d'djà travayé come secrétaire ?

Ern Mi ?... Non !...

Mim Avez d'djà travayé dins in buraû ?

Ern Ele dèrnière place què dj'ai fait, c'èsteut dins dè buraûs.

Lil *entre à G* Tènez v'là in mète !

Clé Alez-i quer in crayon ètout, i n'a né bé seûr sondjé à in prinde iun !

Lec Siè, messieû, dj'ai in crayon !... *à Lily* Mais si vos avîz n'late... Pou fé dè lignes dreutes, c'èst pus aijîle !

Lil Vos n'aurîz né seu l'dire pus timpe ?... Vos n'volez né què dj'dèssine lès plans à vos place ?... Eyè vous l'mèskène, vos n'pourîz né boudjî vos pieds n'miète ?... Pus'c'qu'i gn'a d'djins dins l'maison, pus'què ça va mau !... Quand c'qu'on m'dèsbaras'ra d'tous cès djins-là, hon ?

Scène 10 : Lecompte, Mimy, Lily, Clément, Julien, Maurice, André

Jul *entre à D en sauvage, fusil ou revolver en mains* Sèyance tènante, si vos volez !... Djè m'diseus ètout q'ça n'ît né normal dè vire ôstant d'djins monter au trwèsième étâdje !

Mim Messieû Julien calmez-vous, is n'nos ont ré fait !... Et puis, c'èst danjereûs, vos n'osti !... In coup èst si rade parti !

Jul *coupant court et à Lecompte* Qui èstèz, vous èt què v'nez fé roci ?
 Lec Djè m'apèle Lecompte èt djè sus con...
 Jul Ca, ça s'wèt !... Et après ?
 Lec Enfin non, djè sus déco...ou putot non... ou putot siè... enfin djè n'sais pus c'què dj'sus, mi !
 Jul Mètez-vous là !... *à Clément* Et vous, qui èstèz ?
 Clé Mi djè sus l'nouvìa... ou putot l'ancien... el secrétaire... enfin petète... en ratindant, l'mèskène !
 Jul Djè n'comprend ré du tout !... Mètez-vous là ètout !... *à Ernest* Eyè vous, qui èstèz ?
 Ern Djè sus v'nu pou l'anonce... Mais djè m'in va pac'què dj'su-st-arivè trop tard... enfin p'tète bé qu'oui ou p'tète bé q'non...
 Jul Vos èsplicâçions n'sont né claires !... Mètez-vous là ètout !... *à Mimy et Lily* N'euchîz né peu, savez mès toutes bèles !... Messieû Julien n'a peu d'pèrone !
 Mim Mais enfin, messieû Julien, nos n'povons mau !
 Jul Dj'ai intindu mam'zèle Lily d'mander qu'on l'dèsbarasse dè tous cès djins-là !
 Lil Mais djè n'ai jamais dit qu'i faleut lès twer !... Si on d'veut twer tous lès cés qui embêt'tè leus visins, on n'arèt'reut né d'aspoiyê su l'gachète !
 Jul *toujours prêt* Aspoiyê su l'gachète ? *Clément, Ernest, Lecompte se couchent ou se cachent en criant NON - on sonne* Silence !... Vous-ôtes trwès, dèmeurez là !... Mi, djè va prinde pôsiçion !... *il se cache derrière un meuble* Alez, Lily, allez ouvri ! *Après beaucoup d'hésitations, elle va ouvrir. Maurice et André entrent, bien habillés, un bouquet de fleurs en mains*
 Mau C'èst bé roci qu'on a dandjî d'in secrétaire ?
 And Nos èstons à deûs, mais c'èst bé seur mi l'mèyeu !
 Jul Waut lès mins !... In pas d'pus èt vos stez mourts !
 Mau Mais enfin, messieû Julien, c'èst mi, Maurice, èl facteûr... El petit facteûr si djinti qui vos aporteut vos pension tous lès mwès !
 Jul Et qui buveut n'dèmi boutèye dè goute avant d'sorti !... Eureûsemint què l'Posse a suprimé l'sèrvice !...
 And Mais mi, vos mè r'conaissez bé... André, èl boutchî... Qui fait dè l'si bone saucisse !
 Jul Boutchî ou non, vos stez dins l'pétrin !
 Mim Disez messieû Julien, aurez bé rade fini d'fé vos cinéma ?... Ermetez vos fusil (révolver) à place èt foutez-nous la pais !
 Jul Ah bon !... Djè vos aurai prév'nu ! *On sonne*

Scène 11 : Lecompte, Mimy, Lily, Clément, Julien, Maurice, André, Michou

 Lil *apeurée* On a soné !
 Mim Et bé qué ratindez pou daler ouvri ?
 Lil Ah non !... Dj'ai ieu trop peu quand lès deûs albrans son-st-arivé !... Au tour d'in ôte !
 Jul El facteûr n'a qu'à i aler !
 Mau Ah non !... Jénéralemint l'facteûr, c'èst li qui sone èt on vét i ouvri !

And Eyè l'boutchî, il èst toudis padrî s'comptwèr !... C'est rare quand i passe dè l'ôte costé ! *On sonne*

Jul *à Lecompte* El décorateûr n'a qu'à i aler !...

Lec Ah non !... Djè deûs m'surer pou fé lès plans.

Jul Vos tirez à plan pou fé vos plans mais vos nos l'yez en plan !... Djè va l'fé, mi !... *se cache et crie* Intrez !

Mich Ah tout d'min.me !... Vos d'avez mis iun d'temps !...à *Clément* C'est vous, m'pètit Mimi, qui m'a d'mandé d'vèni ?

Clé Djè n'ai ré d'mandé, mi !... Et d'abourd, qui èstèz ?

Jul *sort de sa cachette en pointant son fusil* Oui, qui èstèz ?

Mich *sautant dans les bras de Clément* Hou !... Au s'cours !

Mim Messieû Julien dèmeurez tranquîye !... Lèyez-l'sè spliquê !

Mich On m'a d'mandé d'vèni chez Mimi Olivier !... Alors, djè sus v'nu, mi !

Mim Mimi, c'est mi !...

Mich *déçu* Ah c'est vous ?...*regardant Clément* Dj'aureus ieu mieus... Enfin !... Djè m'apèle Michou Lefort !... Djè sus décorateûr !

Mim Insi c'est vous l'décorateûr què dj'ratindeus !... Vos povez bé dèskinde, vos stez arivé !... *se tourne vers Lecompte* Mais vous... Qui èstèz, vous ?

Lec Et bé... C'è-st-in ereûr !... Djè sus... Djès sus l'nouvua controleûr dèès contribuçons !

Lil Et vos vos avez fait passer pou l'décorateûr ?

Lec C'est vous qui n'm'a né l'yé l'temps d'mè spliquê !

Lil Et ave vos douce alène, vos avez réyussi à m'fé causer !

Mim Què c'què vos i avez raconté ?

Lil Bé ... qu'i gn'a lès abonemints... èt puis l'rèsse en nwèr...

Mim En'l'ascoutez né, savez messieû l' controleûr, èle dit n'importè qwè !.. D'alieûrs, èle n'i coneut ré !

Clé Djè vos l'aveus dit qu'il a veut l'air bizarre pou in'décorateûr !

Mim Lily, à partir dè mètnant, vos arètez d'vos méler d'tout !...

Lil Bé c'est vous qui m'a dit d'i t'ni compagniye... Vos n'avîz qu'à l'fé fé pa l'mèskène !

Mim Ele mèskène n'est né l'mèskène !... Vos l'avez pris pou l'mèskène alors qu'i v'neut pou l'place dè secrétaire.

Lil Résultat dèès courses : nos n'avons co pwins d'mèskène !

Ern Si djè peus dire ène saqwè... Dj'ai petète ène soluçon pour vous !

Mim Ah oui, djè vos aveus roublé, mi...Djè r'grète, messieû, mais vos stez arivé trop tard pou l'place dè secrétaire.

Ern Djè n'vèneus né pou l'place dè secrétaire, mi... Djè v'neus pou l'place dè mèskène !

Lil On vos ingadje sèyance tènante !

Mim In ome ?... Pou l'place dè mèskène ?

Ern Gn'a bé dèès feumes qui min.nté dèès-autobus èt dèès camions !

Mim Oui, c'est l'vrai, çoulà... Bon, résumons-nous... Nos avons roci in concièrje qui s'prind pou in grand résistant mais qui s'mouche padrî in meube quand l'sonète va !

Lil Deux bias djodjos qui vourinent bé iète secrétaires mais qui sont tout djusse bons à djwer à Strasky èt Hutch !

Mim In controleûr dèès contribuçons qui s'fé passer pou in décorateûr.

Lil In secrétaire què dj'pèrdeus pou l'mèskène.
Mim Ene mèskène qui è-st-in-ome !
Lil Et in décorateur qu'a putôt l'air d'ène feume !
Mim Il èst temps d'mète dè l'orde dins tout ça !... Et pou cominci, djè vos présinte Clément Lavarel, el grand amour dè m'viye !
Jul Comint c'qu'èle l'a ap'lé ?
Lec Lajavel !
Mim Lavarel... Vincent Lavarel... V'là cinq ans qu'il èst parti à l'étranger pou s'n'ouvrâdje... Mais mètiant qu'il èst r'vènu, djè nè l'lache pus !... Et nos alons dèsbouchî n'bone boutèye !... Alez, Lily, allez qué lès vères !
Lil Ah bé l'nouvèle mèskène n'a qu'à l'fé !
Ern Djè n'sus né co en sèrvice, djè n'ai né co mis mès bèlès loques !
Lil Ca comince bé !... Ou putot non, ça continuwe !... Lily par-ci, Lily par-là... *se met à pleurer* Djè sus vramint l'esclave dè l'maison !...

Rideau

Acte 2

un mois après... Les travaux sont terminés

Scène 1 : Mimy, Lily, Ernest, Jullien, Michou

Mim *entre à G avec Lily* ... et puis, i n'faut né roubliyî q'vos povez dèscompter d'vos contributions tous lès travaus q'vos allez fé.
Lil Ave l'controlêur q'nos avons, il èst quèstion dè r'wèti à ç'qu'on fait !
Mim C'èst vrai qu'i n'a né l'air agréyâbe !... In nouvia ramon, ça ramone toudis bé !
Lil I n'rit jamais què quand i s'brûle !
Mim Bah, tout finit toudis pa s'arindjî !... On a réyussi à fé in djardin au trwèsième èt on a co trouvé dè l'place pou vos lodjî quand min.me !
Lil Nos avons ieu dè l'tchance dè tchèyi su in bon décorateur !
Mim C'èst l'vrai, çoulà !... Il a foûrt bé travayé !
Lil Ca n'plaira né petète à tèrtous, mais à nous, ça nos plait bé, c'èst l'principal !
Ern *entre à G. Il est habillé à l'ancienne : chemise blanche, gilet et pantalon noirs. Il parle sèchement...* Il èst dîs-eûres !... Djè vos chères vos café roci ou bé au salon ?
Mim Vos povez nos l'chèrvi roci... Volez bé n'pwins mète dè suke audjourdû, s'i vous plait Ernest ?
Lil Mi, djè voureus bé n'miète pus d'lait q'ièr', s'i vous plait Ernest.
Ern Pwins d'suke èyè pus d'lait !... Ca va !... *sort à G*
Lil C'èst quand min.me domâdje dè d'vwèr'dire s'i vous plait à n'mèskène !...
Mim C'èst vrai, mais i travaye bé !... Et puis, c'èst si agréyâbe dè s'fé chèrvi pa in-ome !

Ern *entre à G* V'là vos cafés !... *à Mimy* Vous, ave n'miète pus d'lait... *à Lily* Vous, sans suke !

Mim Djè n'voureus né vos choquî, mais dj'ai l'idèye què vos vous avez trompé !

Ern Et alors ?... Gn'a qu'à candjî lès jates dè place èt l'affaire èst faite !... Lès feumes, ça fait toudis dè monchas d'affaires pou ré du tout !

Jul *entre à D sans sonner* Bondjou mès toutes bèles !... El factèur vét d'passer !

Ern Disez, vous, vos n'saurîz né soner come tout l'monde ?

Jul Oh bé ça n'chèt à ré d'dèrindjî lès djins !... Dj'ai l'abitude dè l'maison !

Mim Ca fait dèsanèyes qui rinte sans soner !

Ern Et bé, à partir dè mètnant, vos son'rez avant d'intrer !... Mi, djè sus payé pou fé l'sèrvice... Ca supose què dj'va ouvri l'uche quand on sone !... Si tout l'monde rinte sans soner, djè risque dè mè r'trouver au chômadje !

Jul *abasourdi* Si vos i t'nez tant q'ça, djè veus bé fé in-èfour !

Mim Achisez-vous d'lè nous, messieû Julien... Vos bwèrez bé n'jate dè café !... Ernest, volez bé, s'i vous plait, aporter du café à messieû Julien ?

Ern Du nwère ave du suke ?

Jul Dj'aim'reus ôstant sans suke mais ave du lait !

Ern Qu'il èst contrariant, bon sang, qu'il èst contrariant ! *Sort à G*

Jul Vos n'dèvrîz né vos l'yî traiter insi !

Mim Il èst n'miète à s'mode, c'èst vrai, mais i n'èst né mau djinti !

Jul Il èst toudis agrèssif quand i cause... Si dj'èsteus à vos place, ça n'd'ireut né insi... Ene mèskène, ça deut ascouter et exécuter lès-ordes... Mi, djè l'drès'reus, savez mi ! Ah ça oui ! *Ernest est entré à G et a entendu la dernière phrase*

Ern Qu'avez dit, vous ?

Jul Ah ça oui... què vos n'apartemint èst bia insi !... Come ça candje, tout d'min.me, ène miète dè couleur et saquants plantes vèrtes... Vos n'trouvez né, Ernest ?

Ern Djè sus payé pou travayî, né pou admirer l'paysâdje ! *Il va s'occuper tout en écoutant la conversation*

Mim Et bé ça m'fait plaisi què m'n'apartemint vos plaise bé, messieû Julien.

Jul *un peu contre sa pensée* Ah oui qu'i m'plait bé... C'èst bia, mais...

Lil Mais qwè ?

Jul I m'chène què ça fait n'miète...

Mim Ene miète qwè ?

Jul Bé, ça fait...

Ern Bordel !

Jul *fort embêté* Oh !... Oh mais non, savez !...

Mim Què c'què vos insinuwez, messieû Julien ?

Jul C'n'èst né c'què dj'voleus dire... Mais faut r'conaite què vos décoretèur... il a dè idèyes bizarres !

Lil Què volez dire ?

Jul Bé djè trouve... enfin djè pinse... qu'il a n'pèrsonalité... D'alieûrs, ça s'wèt dins s'façon d'travayî !

Mim Il a fait tout-à-fait c'què dj'voleus !

Lil Et vos n'saurîz né trouver in-ome pus djinti q'li !

Jul In-ome... Enfin... Méfiez-vous toudis d'li ! *On sonne. Ernest va ouvrir puis s'occupe encore dans l'appartement*

Mic Bondjou m'pètit Ernest !... Bondjou mès chériyes !... Avez bé dormi ?... Mi, dj'ai fait dès cauch'mards toute èle nût.

Mim Bondjou Michou !... Djè sus bé binaise dè vos vire, pac'què tous lès djous, on m'fait dès compliments su vos n'ouvrâdje !... Nos-in causines co tout mètnant ave messieû Julien !

Lil I d'seut djustemint q'vos avîz bran.mint d'idèyes... Eno, messieû Julien ?

Jul Oui bé seûr !... Bran.mint d'idèyes !

Mich C'èst vrai, ça vos plait bé ?... Oh què dj'sus binaise !

Lil I trouve què ça fait... Comint avez dit ?

Jul Dj'ai dit q'c'èsteut bia !

Mich Oh merci, messieû Julien... Disez, djè peus bé vos ap'ler Juju ?... Ca fait pus intime !... Si vos volez, dj'irai fé vos n'apartemint ètout !

Jul Oh non merci !

Mich Djè vos f'rai in pris d'ami.

Jul Non, dj'aime mieus warder m'n'apartemint come il èst !

Lil Mais mi, djè voureus bé r'fé m'boutique... C'è-st-ène boutique dè réjime !

Mich Ene boutique dè réjime ?... Djustemint, i faut absolument què dj'fasse atinçion à m'ligne !...

Lil Vènez ave mi au salon, djè va vos spliquî c'què dj'voureus bé fé !

Mich Djè vos chus, m'pètit chou !... A t'à-l'eûre, èm pètit Juju !... *sortent à G et Ernest les suit*

Jul Djè n'm'i f'rai jamais !... V'là qu'i s'tracasse pou s'ligne, té mètnant !... *le téléphone sonne... Mimy va vers le bureau et décroche. Julien va s'asseoir... On aura tout vu !* Dins qué sièke èc'què nos viquons ?...

Scène 2 : Mimy, Julien, Ernest, Lily, (Clément – off au téléphone)

Mim Alô ?...

Clé *off* Bondjou Mimy !... Avez bé dormi ?

Mim Oui, foûrt bé ... Mais ça fait d'djà in p'tit temps què dj'sus l'vèye, savez.

Clé El temps m'chèneut long sans vous... Dj'ai ieu inviye d'vos téléphoner pou vos dire bondjou.

Mim C'èst djinti, ça... Pouqwè n'vènez né djusqu'à ci ?

Clé Djè pinseus q'vos travayîz èt djè n'voleus né vos dèrindjî !

Mim Vos savez bé q'vos n'mè dèrindjez jamais !... Alez, vènez rademint !

Clé Dj'arive !... A t'à-l'eûre !

Mim A tout d'suite !... *fin de la communication - elle se retourne et voit Julien qui l'écoutait* Ah vos stîz la ?... C'n'èst né bé, çoulà, d'ascouter mès conversâcions.

Jul N'vos-in f'jez né !... Dj'ai coneu tout ça quand dj'èsteus djon.ne.

Mim Oui, mais tout d'min.me, ça n'sè fait né ! *Ernest entre à G et s'occupe à prendre les poussières. Il doit comprendre le sens de la conversation*

Jul I vos a pourtant l'yé tchèyi tout d'in coup, d'après c'què vos m'avez spliqué.

Mim Pou fé carrière, i faleut bé qu'i parte à l'étranger.
 Jul Dj'in coneus bé iun qui steut à l'èscole ave li !... Il a trouvé n'bèle place en Belgique !
 Mim Tout l'monde n'a né toudis l'min.me tchance !
 Jul Ou bé i n'aura né bé caché !
 Mim Enfin mètнант, il èst r'vènu. C'est l'principal !
 Jul Djusqu'au djou qu'i r'partira co, sait-on jamais ! *Ernest sort à G*
 Mim I m'a promis qu'i n's'indireut pus !
 Jul Djè l'souwaite pour vous !... Alez, djè va fé m'n'ouvrâdje... *sort à D*
 Mim *va à son bureau et se met à travailler... mais elle réfléchit beaucoup...* C'est l'vrai, çoulà, il èst parti quasimint du djou au lend'min... Et mi, djè sus d'meurèye toute seule !... Si ça tchèt, din in mwès...
 Lil *entre à G* Ca i èst, Michou èst d'acourd pou fé l'boutique...
 Mim *sèchement* Què volez q'ça m'faiche !... Ca n'm'intèresse né !
 Lil Mais enfin, Mimy, què c'qui vos prind ?
 Mim I m'pind q'djè n'veus né intinde causer d'vous ni d'vos boutique !... Lèyez-m'tranquîye !
 Lil Ah bon !... Et bé quand vos s'rez calmèye, vos n'aurez qu'à criyî in coup !... En ratindant, djè m'va r'trouver Michou !...Ave li, au mwins, on a du plaisi ! *Sort à G*

Scène 3 : Mimy, Ernest, Clément

 Clé *sonne et entre à D avec un bouquet de fleurs* Bondjou m'pètit keûr dè bûre !... Dj'ai pinsé qu'in p'tit bouquet d'fleurs vos f'reut plaisi !
 Mim *se lève, prend les fleurs et les jette sur le bureau, puis traverse la scène à l'opposé de Clément* Djè n'ai né l'temps d'm'ocuper d'vous pou l'momint. Dj'ai d'l'ouvrâdje !
 Clé Mais c'est vous qui m'a dit t'à-l'eûre...
 Mim T'à-l'eûre c'estèut t'à-l'eûre... Mètнант, djè n'ai pwins d'temps à pièrde !
 Clé Mais enfin, Mimy, c'est vous qui m'a dit d'vèni.
 Mim Mi qui vos a dit d'vèni ?... C'est vous qui m'a dit què l'temps vos ch'neut long !
 Clé Djè pinseus q'ça vos f'reut plaisi dè m'vire ! *Ernest entre à G*
 Mim Clément, vos m'énèrvez !... C'n'est pus lè pène dè r'vèni si c'est co pou r'parti ôssi rade !
 Clé Què c'què vos racontez
 Mim Vos m'avez foûrt bé compris !... Djè n'ai pus ré à vos dire !... *sort à G*
 Clé Mais Mimy... Què c'qu'èlle a ?... Qué c'què dj'ai fait d'mau ?...
 Ern En'cachez né à comprinde !... Lès feumes, c'est toutes lès min.mes... In djou, èles vos wèytè voltî à tout squèter èyè l'lend'min èles vos avoy-tè mèch'ner pus reud qu'adjèlé !
 Clé Djè n'mérite né d'iète traité insi !
 Ern Mam'zèle Mimy vos wèt trop voltî !... C'est pou ça qu'èle vos traite insi !
 Clé Pac'què vos trouvez q'c'è-st-ène façon normale dè vire voltî, vous ?
 Ern Ele vos a d'djà pièrdu in coup, èl né tèt né à r'comincî !
 Clé Ele n'a né d'djà r'wèté mès fleurs !

Ern En'vos-in f'jez né !... Quand vos s'rez parti, èle sè d'ocup'ra !
Clé C'est ça, djè m'in va... Ca m'f'ra du bé d'prinde l'air... *sort à D*

Scène 4 : Ernest

Ern *prend son gsm et forme un numéro... Il tire de sa poche un carnet dans lequel il aura inscrit les messages... Blanche colombe à quartier général !... Djè sus dins l'place ! L'ours èn'mè plait né !... Faura qu'i route dreut, sinon bé !... Ele soris blanche à l'air pus sote què sâdje !... Ele pantère a agné l'bèdot !... Djè répète : èle pantère a agné l'bèdot !... Lily et Michou entrent à G. Ernest remet gsm et carnet en place puis fait semblant de prendre les poussières... puis il sort à G*

Scène 5 : Lily, Michou, Mimy

Mich ... èt nos mèt'rons l'façade en rose !... Vos wèrez, ça s'ra chwète !
Lil Et dire què ça n'chèrvira petète à ré !
Mich Mais siè, m'pètite pouyète !... Djè vos amin.n'rai mès copins... Vos wèrez come is sont chous !
Lil Ah si vos m'faisez dè l'publicité, ça va daler !
Mich Alez, djè m'sauve !... Djè deûs vire saquants copins du matin... Eles vont s'énerver !
Djè file !... Bisous, bisous !... *sort à D*
Lil Sacré Michou !... C'est vramint plaisi d'li !... Tènez, què c'què c'est d'cès fleurs-là ?...Djè va lès mète dins in vase, sinon èle vont flani !
Mim *entre à G avec un vase et lui prend sèchement les fleurs* En'touchez né à ça, c'n'est né à vous !
Lil Oh la la !... C'est co la joie, come djè wès ! *Sort à G*
Mimy serre les fleurs contre elle, les met dans le vase, sur le bureau puis sort à G.
On sonne

Scène 6 : Ernest, Lecompte, Lily

Ern *entre à G* On arive, on arive !... *voyant les fleurs* Tins, què c'què dj'aveus dit !... Ele lè wèt trop voltî, ça saute aus-îs ! *Va ouvrir*
Lec *il a toujours sa serviette* Djè voureus bé vire Lily Castaigne !... Et djè sus prèssé !
Ern *sans se presser* Djè cours èl'qué... *sort à G... Lecompte regarde la décoration mais n'est pas enthousiaste*
Lil *entre à G. Elle va faire un gros effort pour être agréable* Ah messieû Lecompte !... Dj'èspereus vos visite d'un djou à l'ôte !
Lec *toujours occupé à regarder* Djè deûs dire què c'est spécial !... Foûrt spécial !
Lil Què d'sez d'l'apartemint ?... Ec'què vos l'trouvez bia ? *Ernest entre à G*
Lec Bia, oui !... Mais spécial !... Ca r'chène foûrt à in...
Ern Bordel !
Lec Ah mais c'n'est né ça què dj'voleus dire, savez... Mais enfin, ça r'chène foûrt...

Ern Si ça n'vous plait né, c'est pou quand ça vos plaira !...

Lec Disez à vos mèskène dè m'causer su in ôte ton !... Qu'i n'oublie né qu'il a à fé à in fonçonnaire dins l'ègzêrcice dè sès fonçons !

Ern C'est drole !... On lès apèle dè fonçonnaires èt c'est petète lès cés qui fonçon'tè l'mwins ! *Il évacue les deux tasses à G puis revient et fait semblant de prendre les poussières*

Lec Mam'zèle, dj'ai bé r'wété vos dèrnière déclarâcion... Vos n'gagnez ré, c'n'est né normal !

Lil Mais enfin, djè vos dis d'puis l'début q'mès affaires èn'vont né foûrt bé

Lec Non seulemint vos n'gagnez ré, mais vos avez bran.mint trop d'frais !

Lil I faut tout d'min.me bé què dj'paye èle vindeuse, min.me si èle né vind ré !

Lec Ene vindeuse qui n'vind ré, on l'suprime !

Lil Et on ira raconter pa tous costés q'dj'ai du ravoyî l'vindeuse... Ca s'ra co pire, eno !

Lec Djè n'wès né l'rapourt !

Lil *perdant son calme* Et bé d'abourd, c'est q'vos n'pinsez né come lès-ôtes !

Lec Què volez dire par là ?

Lil Djè veus dire par là què dj'pinseus q'pou travayi aus contribuçons, i faleut iète malin !

Lec Et bé vos vos trompez !... Ele première qualité d'in bon controleûr, c'est d'interpréter l'règlemint à s'façon !

Lil *réalisant qu'elle s'est emportée et reprenant son calme* Admètons q'dj'ai dit n'bièstrîye !... *avec gentillesse* Et après, messieû l'controlèur en chef ?

Lec Vos frais d'déplac'mint !... Què c'què c'est d'çoulà ?

Lil Djè n'ai pwins d'auto èt i gn'a pwins d'bus pou daler djusqu'à l'boutique... I faut bé q'djè prène in taxi !

Lec Lès taxis, ça n'est né du professionnèl !...

Lil *de plus en plus charmeuse* D'acoûrd pou supprimer lès taxis... Et après, c'est tout ?

Lec Eyè lès rèstaurants ?... Vos alez quasimint tous lès djous au rèstaurant !

Lil *elle est à bout et elle se déchaîne* Ascoutez bé !... Djè mindje ayu c'qu'i m'plait, quand i m'plait et ave qui c'qu'i m'plait !... Ca n'est né vos affaires !

Lec Ah ça n'est né mès affaires ?... Et bé c'est c'què nos alons vire... Djè va vos avoyî n'rèctificâcion, mi !... *Lili se met à pleurer* Et c'n'est né lè pène dè mè scrire pou m'dire què vos n'èstèz né d'acoûrd, djè n'candj'rai né d'avis !... C'est bé compris ?

Ern Ca, c'est trop foûrt !... Pou qui vos pèrdez, hon vous ?

Lec Djè n'ai né l'abitude dè tchafyî ave lès mèskènes !

Ern N'impèche què si vos n'volez né awè du brouchton, il èst temps d'vos sauver !...

Lec *sort à D à reculons et en oubliant sa serviette* Outrage à fonçonnaire, ça peut min.ner long !

Ern Alez, à l'uche !

Scène 7 : Lily, Ernest, Clément, Mimy

Ern V'là comint c'qu'on lès traite, tous mès-omes !

Lil *pleurant toujours* En ratindant, ça n'arindj'ra né mès-affaires !

Clé *entre à D* C'n'est q'mi !... Ec'què ça va mieus ?
 Ern Ca dépind !... Pour vous, gn'a qu'à r'wèti l'buraû !
 Clé *voyant les fleurs* Ah, èle lès a mis dins in vase !
 Ern Mais pou mam'zèle Lily, èle vét d'awè l'visite du controleûr !
 Clé Djè l'ai rincontré dins lès scayîs, mais i n'm'a né d'djà vu !
 Lil Djè va bé rade dormi su l'trotwèr', Clément !...
 Clé Mais non, mais non !... I n'faut né vos dèscouradjî... Nos stons là, à costé d'vous !
La prend dans ses bras pour la consoler Eyè pou cominci, n'brèyez pus... *Mimy entre à G* Vos stez bran.mint pus djoliye quand vos riez !
 Lil Merci Clément !... Ca m'fait du bé d'vos awè d'lè mi !
 Mim Faijez come si dj'n'èsteus né là !... On aveut bé raison dè m'dire dè m'méfyî...
 Clé Mais Mimy, què c'qu'i gn'a ?
 Mim Vos m'pèrdez pou in-inocène ?... Djè vos trouve ave Lily dins vos bras èt vos m'demandez c'qu'i gn'a ?... *à Lily* Et vous, vos alez prinde vos cliques èt vos clagues et vos -in daler !... *Lily pleure de plus belle*
 Clé Mais enfin, Mimy, calmez-vous !... Ascoutez au mwins c'qu'on veut vos dire !
 Mim Djè n'ai ré à ascouter èt djè n'ai pus ré à dire non pus !... *sort à G*
 Clé Mais Mimy...
 Ern Lèyez-l', ça pas'ra come èl rèstant !... Vènez Mam'zèle Lily, vènez vos r'pouser n'miète !... *Ernest et Lily sortent à G*

Scène 8 : Clément, Mimy

Clé Djè n'ai pwins d'tchance !... Djè wès voltî n'feume qui m'wèt voltî ètout !... *prend sur le bureau une photo de Mimy et lui parle* Et malgré ça, c'èst l'guère tous lès djous !... Pouqwè vos tourminter ?... Djè sus si bé dins vos bras... Nos pourines iète eûreûs tous lès deûs... Si vos savîz come djè l'voureus... *Mimy est entrée à G pendant le monologue*
 Mim Ca vos-arive souvint d'causer à n'foto ?
 Clé Ah, vos stîz là ?
 Mim Et dj'ai intindu !... Clément, i vos faut cachî à m'comprinde !... Djè viqueus toute seûle dins l'apartemint... Dj'ai sté bé binaise d'awè messieû Julien quand dj'aveus dandjî... Mais mètнанt... C'èst li qui m'a dit q'vos alîz petète èrparti... Et c'èst pou ça què dj'vos ai mau r'çeu....
 Clé Ah c'èsteut simplemint ça ?... Alez, n'in causons pus !... Vènez dins mès bras... *ils vont s'embrasser quand on sonne*

Scène 9 : Mimy, Clément, Ernest, Lecompte

Ern *entre à G* Scusez-m', mais l'sèrvice, c'èst l'sèrvice ! *Va ouvrir*
 Lec *entre à D en se méfiant d'Ernest* Djè creus q'dj'ai roublié m'sèrviète !... Djè n'fais q'passer !
 Mim Ah bé tènèz, v'là messieû Lecompte !... Et alors, i paraît qu'on fait dès misères à Lily ?

Lec Mi ?... Non, né du tout !

Clé Vos n'i f'jez pwins d'cadaû non pus !

Lec *important* Djè fais m'mèstî l'mieus possibe ! *Mimy, Clément et Ernest lui font une scène dramatique amplifiée par des jeux de lumière*

Mim C'est maleûreûs d'fé in mèstî ôssi déagréyâbe !

Clé D'alieûrs on wèt bé à s'visâdje què ça l'contrariye !

Mim C'est s'consiyince qui l'tourmint !

Ern Faut né d'mander quand i s'ra moûrt !

Clé Quand toutes sès victimes vèront chatouyî l'plante dè sès pièds !

Ern Ca, c'est trop bia pour li !... I n'sintira pus ré !

Mim On n'va né tout d'min.me l'atèrer tout viquant !

Ern Pouqwè né !... Padsous m'montagne dè liards !

Clé Stoufi padsous saquants millions, ça n'deut né iète gai !

Ern Surtout si c'est dè pièces !... C'est bran.mint pus pèsant q'dès billèts !

Lec Assez !... Par pitié, arêtez !

Mim Vos-avez peu, messieû Lecompte ?

Lec Non !

Clé Mais vos n'estez né à l'aise non pus !

Lec Non !

Ern Come il èst là, il èst prêt' à r'vèni en arière ave mam'zèle Lily !

Lec Non ! *fin de la scène dramatique.*

Mim Vos n'aurîz né pitié d'ène pètte feume sans défense ?... Mi qui vos crwèyeus bé djinti !

Lec Ah mais pour vous, djè f'reus petète in-èfourt !

Clé Donc, c'è-st-à l'tchèsse du client !

Lec Non, c'est pac'què dj'trouve què mam'zèle Mimy èst trop honête dins sès déclarâçons.

Mim Comint d'sez ?

Lec Ah djè n'ai ré dit !...

Mim Si fait !... Si dj'comprend bé, vos trouvez què dj'paye trop d'contribuçions !... Vos pourîz petète èm'doner in p'tit consèye !... Vos n'f'rîz né ça pour mi ?

Lec Oh pour vous, djè f'reus n'importè qwè !... Mais... *regardant les deux autres...*

Mim Ca s'reut pus facile si nos n'èstines què nous deûs !

Lec Oh oui q'ça s'reut pus facile !

Mim Et bé Clément et Ernest vont nos l'yî... *aux deux* Vos volez bé ?... *ils sortent à G V'là, nos stons tranquîyes !*

Lec Mais i faut q'tout ça d'meure intrè nous !...

Mim Pwins d'imbaras !... Volez in p'tit vère ? *Elle lui servira à boire pendant la conversation. Emporté par sa théorie et les petits verres, il prendra la bouteille et se servira lui-même. Il finira par gesticuler très fort*

Lec Et bé v'là !... Ave tous lès r'vènus q'vos déclarez, vos d'vrîz sondjî à augminter vos frais.

Mim Ah bé wètez, djè n'ai jamais pinsé à ça !

Lec C'est quand min.me domâdje de payî trop d'contribuçions !... Vos n'auto, par ègzimpe...

Mim I gn'a à pène deûs kilomètes pou daler à l'institut...

Lec Vos-invitez quéq'fwès dès clientes à din.ner !

Mim Ca arive, mais c'est rare !... Quand dj'va au restaurant, c'è-st-ave dès camarades !

Lec Ca n'fait ré... Du momint q'vos avez dès tickets d'caisse !...

Mim Come vos-i alez, messieû Lecompte !

Lec Eyè toutes lès robes què vos-ach'tez !... Frais jénéraûs !...

Mim C'est vrai q'djè deûs iète présintâbe pou mès clientes !

Lec Ah mais ça, n'euchîz né peu, vos l'èstez !... Vos avez d'alieûs bran.mint d'goût pou vos-abiyî !

Mim C'est djinti d'mè l'dire !

Lec C'est vrai q'vos stez toudis foûrt djolîye... Dj'aime bé c'què vos portez !

Mim Djè sus bé binaise què ça vos plaise !

Lec Si djè n'mè rasténeus né, djè pèdr'eus voltî in abon'mint à l'institut !

Mim Mais djè nè r'çeus q'dès feumes, savez !

Lec Djè roubliy'reus tout : lès swins qui n'sont né compris dins l'abon'mint... D'alieûs djè n'i pinse dedjà pus !... Djè s'rai pour vous in Tarzan dès temps modèrnes ! *Il peut sauter sur une chaise et pousser le cri célèbre* Djè s'rai l'James Bond 008 du buraû réjional !... El Lagardère qui va-t-à toi !... *il mime une attaque d'escrime et se bloque le dos* Aie !... Aie !... Què ça fait maû !...

Mim Què c'qui vos arive, messieû Lecompte ?

Lec Aie !... C'est m'siatique qui mè r'prind !... Dj'aurai fait in faû mouvemint !

Mim Achisez-vous n'miète, ça va passer.

Lec Non, achis c'est co pire !... I faut q'djè m'coutche dèssus m'vinte, gn'a qu'insi q'ça passe !

Mim Ernest va s'ocuper d'vous !... *appelle à G* Ernest, vènez rademint !... *il a voulu se redresser mais est retombé en se pendant au cou de Mimy*

Ern *entre à G avec Clément* Què c'qui s'passe, mam'zèle Mimy ?

Mim Vènez doner in coup d'min à messieû Lecompte !... Il a atrapé n'siatique !... I faut l'min.ner s'coutchî.

Ern Vènez ave mi !... Djè va vos croquî pou vos r'mète d'alure !

Lec *criant déjà* Non !... Djè n'veus né qu'i m'touche !... *sans lâcher Mimy* En'm'abandonez né dins in parèye momint !

Mim Fuchîz raisonâbe... Alez, Ernest, min.nez-l'dins m'tchambe èt mètez-l'coutchî d'su m'lit !... *Ernest et Lecompte sortent à G*

Clé *sèchement* Vos-aurîz du l'massî, ça i aureut fé du bé !

Mim Mais què c'qui vos prind ?

Clé I m'prind q'djè n'aime né d'in vire in-ôte pindu à vos cou !

Mim Il a atrapé n'siatique èt djè i ai doné in coup d'min... Vos n'aurîz né fait l'min.me si l'cas s'aveut présinté ?

Clé Siè !... Vos-avez raison !... Djè n'suporte né d'vire in-ôte ome tourner alintour de vous !

Mim Et nos-alons toudis nos disputer pou dès bièstrîyes parèyes ?

Clé Non !... I nos faut iète pus fôurts què ça... Djè vos promèts d'iète raisonâble !... Et pou vos l'prouver, djè va vos doner in bon gros bêtche !

Mim Depuis l'temps què dj'ratind ! *veulent s'embrasser mais Ernest entre à G*

Ern Ca i èst !... L'mau bèl'air èst couché !... Ca a l'air d'aler mieus !

Mim Tant mieus !... Vènez Clément, alons i dire bondjou... Et su l'tchemin, nos r'pèdrans nos conversâcion...

Clé Oui, pac'què nos stines arivés à in pwins fôurt important !...

Scène 10 : Ernest, Lily, Julien

Ern *prend son gsm et forme un numéro... Même jeu que précédemment... Pendant la conversation, on sonnera plusieurs fois* Blanche colombe à quartier général !... El lion a lancé in-ofensive !...Dj'èsteus là pou sauver l'gâte... Ele pantère a co grifé l'bèdot, mais i s'a r'bèlé ... El lion triane su sès-arières... Dè répète : El lion triane su sès-arières...

Lil *entre à G... Ernest fait semblant...* Et bé qwè Ernest, vos n'alez pus ouvri ?... Ca fait in quart d'eûre qu'on sone !

Ern On a soné ?... Scusez-m', djè n'ai né intindu !... *va ouvrir*

Lil I m'chène qu'il a l'air bizare, mi !...

Jul *entre à D* Djè f'rai r'marquî à tout l'monde què dj'ai soné !

Lil Et vos avez min.me soné à répètiçon !

Jul Quand on s'mèle dè voulwèr fé l'sèrvice, on l'fait come i faut !

Ern Scusez-m', messieû Julien, djè n'vos aveus né intindu !

Lil Pourtant, vos n'estîz né long d'l'uche !

Ern Dj'aveus m'tchèsse alieûrs !

Jul Vos s'rîz petète bé inspiré d'prinde vos tchèsse ave vous quand vos-alez quèq'part !

Ern Et vous, ça n'f'reut pwins d'tort si vos oubliyî vos langue dè temps en temps!*sort à G*

Lil *qui a du plaisir* Ah bé ç-tèllà vos n'l'avez né volé !... Vos savez bé qu'i n'suporte né qu'on djuwe ave sès pièds.

Jul Et mi djè dis qu'i n'a né s'place roci !... Djè n'comprend né comint c'què vos povez suporter ça !

Lil Avez r'marqué qu'i s'a scusé dè n'né vos awè ouvri pus timpe !

Jul Ca n'est né dins sès-abitudes !... I n'deut né iète dins s'n'état normal.

Lil Faut sawè c'què vos volez !... I rèspond d'trèviè èyè vos trouvez qu'i n'est né à s'place... I s'èscuse et vos trouvez q'ça n'est né normal !

Jul Djè prétind qu'i n'a né s'place dins n'maison come èç-tèlçi... D'alieûrs, c'èst come l'ôte inocint ...

Lil L'ôte inocint ?

Jul Michou, come vos d'sez !...

Lil Et pouqwè ça ?... Michou èst bé djinti èt i travaye bé !

Jul Oui mais enfin, il a dès alures spéciales... *peut imiter discrètement*

Lil Si nos causines d'ôte chouse ?... Chaque coup q'vos v'nez roci, c'èst pou taper su l'dos dè djins.

Scène 11 : Lily, Julien, Lecompte, Ernest, Clément, Mimy, Michou

- Lec *on l'entend hurler en coulisse* Aie !... Aie !... Mais allez-i douc'mint !... *puis il entre à G suivi d'Ernest* Lèyez-m'tranquîye, vos w'yez bé q'ça n'chèrt à ré !
- Jul Mais c'est l'controleûr dès contibuçons !... Què c'qu'il a ?
- Lec Il a volu m'croquî !
- Jul Djè vos l'aveus dit qu'i n'èsteut né dins s'n'état normal !
- Lil *à Ernest* Mais què c'qu'i vos-a pis ?
- Ern Dj'ai asprouvé dè l'croquî pou fé passer s'siatique....
- Mim *entre à G avec Clément* Qui c'qu'on a intindu criyî insi ?
- Lec C'est c'n'inocint-là !... Il a tchipoté tous mès-ochas !... Et pus'què dj'crieus pus'qu'il aspoyeut !
- Clé Ah ça n'èsteut q'ça ?... On aureut dit qu'on tweut n'saqui !
- Lil Faut né rire ave ça !... Ca fait mau, savez, n'siatique !
- Lec Ah oui q'ça fait mau !... *s'appuie sur le bureau*
- Mich *sonne et entre à D* Bondjou à tèrtous !... Mam'zèle Lily, vènez vire, dj'ai dèssiné l'nouvèle façade dè vos boutique... *il déplie et installe une grande feuille sur le bureau en poussant Lecompte* Allez, grand sot, poussez-vous n'miète !
- Lec *hurle* Aie !... Ca fait mau, savez !
- Mich *apeuré* Hou !... Mais què c'qu'il a ?
- Lil Il a atrapé n'siatique... Et en l'bousculant, vos i avez fait mau !
- Mich Mais c'n'èst né n'raison, ça !
- Lec *l'imitant* Mais c'n'èst né n'raison, ça !
- Clé Allez, moustrez-nous vos dessin !... *tout le monde se penche sur le bureau, sauf Lecompte et Lily*
- Lil Vènez vos-achire dins in fauteuil !
- Lec Non, dj'aime mieus d'meurer stampé ! *Il s'appuie sur le dossier du fauteuil*
- Lil Vos avez dès pilules à prinde ?
- Lec Pwins d'pilules !... Repos complet èt quand ça fait trop mau, djè frote ène miète.
- Lil Ayu avez mau, au djuste ?
- Lec Là, su l'gros dè l'fèsse ... Mais ça lance djusqu'à mès-artchas !
- Lil *pointe un doigt sur l'endroit douloureux* C'est là q'ça vos fait mau ?
- Lec *douloureusement* Oui !
- Lil *étendant la main* Là tout-àlintour ?
- Lec *moins douloureusement* Oui, c'est là
- Lil *descendant la main vers la cuisse* Et ça va djusqu'à là ?
- Lec *de moins en moins douloureux* Et co pus bas !
- Lil *joignant le geste* I vos faureut in bon massâdje !
- Lec *soulagé* Oui, c'est ça qu'i m'faureut...
- Lil *massant généreusement la fesse et la cuisse* Volez què dj'vos masse, messieû Lecompte ?
- Lec *enchanté* Oh oui, mam'zèle Lily !
- Mich *a entendu la dernière phrase, lève la tête et voit le manège* Oh !... Djè peus bé vos masser ètout ?

Lec Oh non, né vous !... *s'enfuit à G suivi de Lily* Au s'cours !... Djè n'veus né qu'i m'touche !...

Rideau

Acte 3

Scène 1 : Clément, Lecompte, Mimy, Ernest, Lily, Michou

Au lever de rideau, Clément et Lecompte travaillent au bureau

Clé Donc, nos stons bé d'acoûrd pou dèscompter les frais d'instalâcion.
Lec Messiêu Lavarel , djè n'ai qu'ène parole ! Vos povez compter d'sus !
Clé C'est bé !... Djè wès q'vos stez dev'nu raisonâbe !
Lec Ah mais djè l'ai toudis sté !
Clé Toudis, c'est bran.mint dire !... Djè m'souvés bé qu'ave Lily...
Lec C'est dè s'fôte !... Si èle nè m'aveut né mau r'çeu...
Clé Bah, c'est du passé, n'in causons pus !... Nos-alons putôt bwère in coup pou roubliyî tout ça !... *appelant Ernest !... Ernest !... ils vont s'asseoir dans la partie salon*
Lec Ca fait qu'insi, c'est d'min q'mam'zèle Mimy présinte ès'colèccion d'bijous !
Clé Oui, c'est d'min l'grand djou !... Oh l'colèccion n'est co qu'à sès débuts, mais djè pinse qu'èle s'agrandira assez rade !... *Ernest entre à G Ernest, volez bé nos chèrvi in p'tit porto, s'i vous plait ? Ernest sort à G*
Lec Mètnant q'vos stez là pou vos ocuper d'sès papîs, èlle aura pus d'temps pou travayî à s'colèccion.
Clé Elle a toutes lès qualités qu'i faut pou réyussi !
Lec Et èle sait c'quèle veut !... C'è-st-in vrai chèf, come on dit !... Tant pire pour vous !
Ernest entre à G et sert
Clé Mi, djè l'wès voltî come èlle èst !... A propos, Ernest, n'oubliez né q'dèmin on a dandjî d'vous pou l'vin d'oneûr !
Ern Mam'zèle Mimy m'd'a causé !
Clé Avez d'djà vos n'abîy'mint ?
Ern Em'n'abîy'mint ?
Clé I vos faura n'djaquète blanche come lès garçons d'café !
Ern Ene djaquète blanche ?
Clé Et dès gants blancs !... Ave n'bèle tchemise blanche èt in nœud nwèr !
Ern I m'faura tout ça ?
Clé Dèspètchez-vous !... I vos d'meure à pène vingt-quatre eûres pou cachî après !... Alez, Ernest, du nèr' !... Ca n'est né l'momint d'prinde racène !
Ern *sort à G Ene djaquète blanche èt in nœud nwèr !*
Lec Sacré Ernest !... I n'a né l'air dè s'rinde compte què c'è-st-ène grande cérémonie qui s'anonce !

Clé Alez, messieû Lecompte, à vos santé !

Lec A vos santé, messieû Lavarel !

Clé Tant q'nos i èstons, nos pourines petète lèyî tchèyi lès "messieû" !

Lec Dj'aleus vos l'proposer !

Clé Et bé mi, c'èst Clément !

Lec Et mi, c'è-st- Achile !

Clé Et bé, Achille, dj'èspère bé q'vos nos f'rez l'oneûr d'assister à l'présintâcion dè d'min !

Lec Mam'zèle Mimy m'a invité. C'è-st-ave grand plaisi q'dj'i s'rai !

Clé Ec'què nos aurons l'plaisi d'vire madame Lecompte ?

Lec Djè n'sus né marié èt djè n'compte né l'fé !

Clé C'èst quéq'fwès si rade arivé !... I sufireut q'vos rinconte ène djon.ne feume dins vos tournèyes ...

Lec Jamais pwins d'familiarité dins l'sèvice !

Clé Supôsons q'Lily vos euche bé r'çeu putot què vos r'poussî !...

Lec Pouqwè causez djustemint d'lèye ?

Clé Pac'qu'èlle èst libe ètout... èt qu'èle masse bé quand on a n'siatique !

Lec On n'atrape né n'siatique tous lès djous...

Clé Et puis c'èst quand min.me ène bèle feume !

Lec Djè n'dis né l'contraire, mais...

Mim *entre à D très énervée* Ah Clément, i faut absolument q'vos téléphone chez Chavète. Is n'm'ont né co aporté lès robes dè swèrèye què dj'ai comandé et on d'a co r'fusé ieune audjourdû... Et puis vos téléphon'rez au mayeûr !... I n'a né co rèspondu à m'n'invitâcion !... *criant à G* Ernest !... Ernest !... *voyant Lecompte* Ah vos stez là, messieû Lecompte !... Scusez-m', djè n'vos aveus né vu !... Dj'ai tél'mint d'affaires à fé pou l'momint... *Ernest est entré à G* Ernest, vos irez chez l'fleurisse Rosaliye pou i dire dè mète quate douzaines dè roses dè pus !... Volez bé m'chèrvi n'jate dè café ?... Dj'ai tél'mint seu !

Ern *voulant sortir à G* Tout d'suite mam'zèle Mimy !

Mim Ou putot non, alez putot què l'bwète qui gn'a su l'siège dè l'auto.

Ern *fait demi-tour et va vers la D* Tout d'suite mam'zèle Mimy !

Mim Après tout non, chèrvez-m'èm'café !... Ele bwète, djè l'pèrd'rai t'à-l'eûre...

Ern *fait demi-tour et sort à G* Tout d'suite mam'zèle Mimy !

Mim Clément, avez sondjé à tout ?... Lès fleurs, c'èst fait !... Lès vitrines pou lès bijoux ètout... Ah oui, avez pinsé au vin d'oneûr ?

Clé Oui, tout 'st-in-orde !... Et dj'ai d'mandé à l'ajence dè mète trwès garçons en plus dè chîs' qu'on aveut d'mandé... *Ernest entre à G avec la tasse de café*

Mim Ah Ernest, n'oubliez né q'dèmin nos-aurons dandjî d'vous !

Ern Pou fé l'garçon d'café, djè su-st-au courant... Ene djaquète blanche èt in nœud nwèr.

Mim Què c'què vos racontez ?... Mais non né pou fé l'garçon d'café... Vous, vos vos ocup'rez du vestiaire !

Ern Ave m'djaquète blanche et mès gants blancs !

Mim Dè qwè ?... Mais non, in costume nwèr èyè n'tchemise blanche... ou putot non, in costume bleu, c'est pus bia !... Bon mètнант, djè m'va rad'mint chez m'cwèfeu !... Clément, n'oubliez né d'téléphoner chez Chavète èno A t'à-l'eûre... *sort à D*

Lec Et bé !... C'n'est né co après ç'numéro-çi què dj'va cachî après n'coumére.

Clé Ca mèт dè l'viye dins l'maison, ène feume qui vique à du deûs cint à l'eûre, qui sondje à tout, qui organise tout...

Lec Et surtout qui comande à tout l'monde !

Ern *sort à G* Ene djaquète nwèr èyè n'tchemise bleu... dès gants nwèr èт in nœud blanc !

Lec Pouve Ernest !... Djè creus qu'i va in rèver !

Lil *entre à D avec Michou* Nos v'là, savez !... Il a falu l'temps, mais ça i èт, tout 'st-in-orde !

Mich Vos wèrez, mès-amis, ça s'ra magnifique !

Clé *à Lecompte* Vos stez au courant q'Lily inaugure ès'nouvèle boutique dèmin ètout ?

Lec Oui, mam'zèle Lily m'a invité... Djè voureus bé i aller, mais lès thès èт lès tisanes, ça n'mè dit né grand chouse !

Lil Ah mais vos n'estez né oblidjé d'ach'ter !... Du momint q'vos v'nez pou l'vin d'oneûr !

Lec Mais djè sus d'djà invité chez mam'zèle Mimy !

Lil Oui, mais lèye c'è-st-à cinq eûres tandis q'mi, c'è-st-à midi... Gn'a moyé d'combiner lès deûs !... *appelant à G* Ernest !... Ernest !...

Clé A condiçion dè n'né trop bwère au premî !

Mich Mi, dins tous lès cas, djè n'bwès q'dè l'iaû !... Djè n'suporte né l'alcol, ça m'done dès tchaleûrs, djè vos jure !

Lil *Ernest entre à G* Ah Ernest !... Dj'aurai dandjî d'vous d'min pou chèrvi lès vères au magasin. Vos volez bé fé ça pour mi, dj'èspère !... *sans lui laisser le temps de répondre* Merci bran.mint, c'est bé djinti !... Mais i vos faura ène djaquète blanche èт in nœud nwèr...

Mich Oh non, ça fait ordinaire !... Mi, djè l'wès bé ave in costume blanc èyè n'tchemise rose !...

Lil Vos f'rez come vos vourez, du momint q'vos stez présintâbe !... Ah, i vos faura passer chez l'fleurisse " Au bouton d'or" ... Vos i d'mand'rez d'aprèster deûs douzaines d'oeillèts pou mèте su l'comptwèr... Vos n'roublî'rez né, Ernest !

Clé Ernest, vos d'vrîz scrire tout ça su in p'tit bouquèt d'papî !

Lec Pèrdez putot n'grande feuye, au train ayu c'què ça va !...

Ern *sort à G, l'air perdu* Djè n'roublî'rai né, non... Djè n'roublî'rai né...

Clé Vènez Achille, nos irons i doner in coup d'min pou noter tout ça !

Lec Et vos vourîz què dj'cache après n'coumére, vous ? *Sortent à G*

Lil Vos stez bé seûr què nos avons pinsé à tout ?

Mich Mais oui, m'chériye !... Ca va iète fou !...

Lil Et bé mètнант, djè va aprèster mès loques... Djè n'sais né co c'què dj'va mèте à m'dos... Em'robe grise ?... Em'robe vèrte què dj'ai ach'té pou l'mariâdje dè m'cousine ?...

Mich Dins tous lès cas, m'pèтite pouyète, i vos faut n'tèне plène dè couleurs....

Lil Em'robe vèrte, c'è-st-in bia vèrt pâle !

Mich Vèrt pâle ?... Oh non !... I vos faut n'saqwè d'vif, dè spitant !... Djè vos wès bé dins n'bèle robe roudje vif... Et ave ça, in bia maquiyâdje èyè n'bèle cwèfure... Dj'ia in camarade, Jean-Mi, qu'èst cwèfeu...djè va i d'mander, i n'peut ré mè r'fuser !

Lil Djè veus bé, mais i faut m'promète què djè n'va né r'vèni ave n'tchèsse pèlèye su lès costés èyè n'toufe rose au mitan !

Mich On n'fait né confiance à s'pètit Michou ?... On fait dès caprices ?...

Lil C'n'èst né ça, mais...

Mich Alors, c'èst parti !... Vènez, nos alons cominci pa ach'ter vos robe !

Lil Si dj'vos-ascoute, i faudra m'lèver à cinq èures du matin pou iète prète à midi ! *Ils sortent à D*

Scène 2 : Ernest

Ern *entre à G* Donc, djè deûs passer chez Rosaliye pou i comander deûs douzaines dè roses èt au "Bouton d'or" pou i dire d'ajouter quate douzaines d'oeillèts... Après ça, i m'faura cachî après n'djaquète blanche èt dè gants bleu... non, ène tchemise nwèr èt in costume rose... Après tout, on wèra bé pus tard !... Mètnant, i gn'a n'saqwè d'pus important à fé !... *il s'installe au bureau, prend son gsm, forme un numéro et tire de sa poche son carnet* Blanche colombe à quartier général !... Lès grandes maneûves ont comincé !... Ele bédot a dompté l'lion... Ele pantère èyè l'gâte tirtè en rafales !... L'assaut final èst prévu pou d'min !...Tèrminé ! *On sonne à D. Ernest se précipite pour ouvrir et oublie son carnet sur le bureau.*

Scène 3 : Ernest, Julien, Clément, Lecompte, Mimy

Jul *entre à D* Bondjou !

Ern Bondjou messieû Julien !

Jul Mam'zèle Mimy n'èst né çi ?

Ern Non, èlle èst sortiye !

Jul I m'chène qu'i gn'a bran.mint d'va èt vient audjourdû !

Ern Ah oui ?... Djè n'ai ré r'marqué !

Jul Bé si fait !... Mam'zèle Mimy èst rintrèye come ène tornade pou r'sorti t'ôssi rade qu'in ouragan !... Puis c'èst mam'zèle Lily qu'èst rintrèye ave l'drole èt is-ont r'sorti n'miète après.

Ern Puisquè vos avez vu mam'zèle Mimy sorti, pouqwè d'mandez si èlle èst çi ?

Jul C'èsteut istwère d'ingadjî l'convèrsâcion.

Ern El court èyè l'long, c'èst q'vos vourîz bé sawè c'qu'i s'passe !

Jul El cé qui n'èst né curieus n'sait jamais ré !

Clé *entre à G avec Lecompte* Qui ç'qu'a soné, Ernest ?...Ah, c'n'èst q'vous, messieû Julien !

Jul Oui, c'n'èst q'mi !...Dj'èsteus v'nu dire in p'tit bondjou en passant !

Ern Il aveut vu mam'zèle Mimy sorti, ça fait qu'i v'neut i dire bondjou !

Clé Vos stez in orijinal, hin vous messieû Julien !

Jul *se référant à Lecompte* Djè wès q'vos-avez dè l'visite, d'aboûrd djè va vos l'yî !... D'ôstant pus qu'i gn'a l'air d'awè bran.mint d'va èt vient audjourdû !

Clé Ah oui ?... Djè n'sais né !... Vos avez r'marqué n'saqwè, vous Ernest ?

Ern Non !... Djè n'ai ré vu dè spécial !

Lec Disez Clément, i nos faureut petète achever lès comptes qué nos avines comincé...

Clé Scusez-m'Achille, mais pou l'momint... Instalez-vous au bureau, vos f'rez bé sans mi... *il va lui faire un peu de place*

Jul Clément !... Achille !... V'là qu'is s'apèl'tè pa leûs p'tits noms té mètnant !

Mim *entre à D* V'là, c'è-st-arindjé ave l'cwèfeu, dj'ai rendez-vous d'min à trwès-eûres... Ernest, i faureut daler chez l'cordonî r'qué mès nouvias solés q'dj'ai fait mète su forme... Ah bondjou messieû Julien !... Scusez-m', djè n'vos-aveus né vu... Dj'ai tél'mint à fé pou l'momint !...

Jul On fait dès préparatifs, mam'zèle Mimy ?

Mim *à Ernest* Et tant q'vos-i s'rez, vos r'pas'rez chez l'imprimeû qué mès cartes dè visite... Clément, ec'què nos avons sondjé à tout ?

Clé *riant* Djè deûs dire què vos avez sondjé à n'masse d'affaires... Djè suppose què vos avez sondjé à tout !

Mim En'vos foutez né d'mi, au d'seus du martché !... Si djè n'mè d'ocupe né, qui c'èst qui l'f'ra ?

Clé Mais n'vos ènèrvez né insi, tout dira bé !

Mim Mais djè n'm'ènèrve né !... Djè n'ai jamais sté si calme !.. Ah, i m'chèneut bé qu'on roublieut n'saqwè !... I nos faut in ome à l'intrèye pou controler lès invitâcions

Clé Djè va d'mander à l'ajence qu'èle nos mète in ome dè pus !

Mim Non, i faut n'saqui q'nos conaissions bé... *on sent qu'elle a sa petite idée* Ene saqui qui n'aura né peu dè s'mète au trèviè d'l'uche s'i faut !... Messieû Julien, vos stez l'ome qu'i nos faut !

Jul Mi ?

Mim Si vos volez m'fé plaisi, vos d'vez dire oui !

Jul Què c'què dj'deûs fé au djusse ,

Mim Vos mète à l'intrèye dè l'sale pou controler lès invitâcions

Jul Mais dè qwè causez ?

Mim Dè l'fièsse dè d'min !

Jul Ele fièsse ?... Qué fièsse, hon ?

Mim Ascoutez, èn'vènez né tout compliquî !.. C'èst oui ou c'èst non ?

Jul Djè veus bé dire oui mais petète què dj'direus non si dj'saveus d'qwè c'qu'i r'tourne !

Mim Clément, ocupez-vous d'li, djè sins què dj'va m'ènèrver !... Djè va m'rafraichi n'miète !... *sort à G*

Ern Et mi djè va vire si l'cordonî a fini lès cartes dè visite !... *sort à D*

Scène 4 : Clément, Lecompte, Julien

Clé Et bé, messieû Julien, pou in coup qu'on vos d'mande in p'tit sèrvice !

Jul In p'tit sèrvice !... In p'tit sèrvice !...

Clé Mimy vos d'mande simplemint d'vos mète à l'intrèye de l'sale pou controler lès invitâcions.

Jul Mais de qué sale causez ?

Clé Mimy présente ès' colèccion d'bijous... Come i gn'aura n'masse de personnalités, i faura survèyi lès-intrèyes !

Jul Ele présente ès'colèccion d'bijous ?

Clé Vos n'estîz né au courant ?... Vous qui sait toudis tout !

Jul Ah bé non !... Em'mouchî ça !... A mi qui n'sais né qwè fé pou i fé plaisi !...Djè i dirai q'ça n'est né bé !... Ah oui q'djè i dirai !

Clé Vos n'direz ré du tout !... Pac'què vos n'avez ré à dire !

Lec *travaille toujours au bureau mais entend la conversation* Iun à zéro !

Jul Elle a sté bé binaise de m'awè pindant q'vous, vos vos foutîz pas mal de lèye !

Lec Iun - Iun !

Clé Ec'què vos pinsez q'Mimy n'est né grande assez pou fé s'viye come èle l'intind ?... Ec'què vos pinsez q'ça i fait plaisi q'vos cole à sès trousses come ène vièye sangsue què vos èstèz ?

Lec Deûs – Iun !

Clé Mais come èle a bon keûr, èle nè veut né vos fé du mau... Elle encaisse tout sans ré dire !... Mais quand ça déborde c'est mi qui ramasse lès boukèts !... Et à cès momints-là, dj'ai bé inviye d' vos spotchî come in aragne !

Lec Trwès – Iun !

Clé L'uche èst là, vos connaissez l'tchemin ! *Julien va pour sortir à D, se retourne pour répondre... mais ne dit rien et sort.*

Lec Quate à iun !... *quitte le bureau* C'è-st-in bia résultat pou in match de fotbal !

Clé Scusez-m', mais ça fait longtemps q'dj'aveus inviye d'yi dire !...

Lec En'vos-in f'jez né, dj'ai l'abitude dins m'mèstî !... Quand l'citèrne èst plène, i faut qu'èle déborde !

Clé *est arrivé près du bureau et a vu le carnet oublié par Ernest* Tènez, vos avez roublié vos carnèt su l'buraû !

Lec Ah non, c'n'est né à mi !

Clé A qui c'est d'aboûrd ?... *lit quelques phrases et paraît étonné*

Scène 5 : Clément, Lecompte, Maurice, Ernest, Mimy

Mau *sonne et entre à D. Visiblement, il a chaud...* Bondjou à vous deûs !

Lec Bondjou facteûr !

Mau Djè vés d'crwèser messieû Julien dins lès scayîs !... I f'seut n'drole de tchèsse !

Lec C'est normal, il a sté batu !

Mau Il a sté batu ?

Lec Il a djwè au fotbal ave Clément et il a encaissé quate goals !

Mau Au fotbal, droci ?... C'coup-ci, vos m'in racontez !... Faut né m'prinde pou in yoyo, savez mi !

Clé Et bé qwè, facteûr, c'è-st-à c'n'eûre-ci qu'on arive ?

Mau *embêté* Bé oui... Djè sus n'miète in r'tard...

Lec *moqueur* Vos avez yeu n'fuite à vos vélo ?

Mau Vos savez tout d'min.me bé qu'i gn'a bèle lurète què djè n'fais pus m'tournèye à vélo !...

Lec Ah, c'èsteut l'bon temps !...Tous lès djins tchafyines voltî n'miète ave l'facteur !

Mau *vindicatif* Et nos f'sines toutes lès maisons tous lès djous.... C'n'èsteut né come mètnant, lès publicités in djou èyè l'rèstant deûs djous après !

Clé Et quand i f'seut tchaud come aujourdû, i d'aveut toudis bé iun ou l'ôte qui vos ofreut n'jate de café pou vos rafraichi.

Mau *sans enthousiasme* Oui !

Lec Ene jate de café ou bé n'pètite goute !

Mau *avec beaucoup d'enthousiasme* Ah oui !

Lec Pourtant, de l'goute pa c'temps-là, ça n'est né l'mèyeû !

Clé Pus'qu'on bwèt, pus'qu'on transpire !

Lec Et pus'qu'on transpire, pus'qu'on a seu...

Mau Donez-m'ène jate de café èt n'in causons pus !

Clé Vos n'aurîz né mieus in vère de bière ?... I d'a dins l'frigo !

Mau Et c'est seûl'mint mètnant q'vos l'disez ?... *Clément lui sert un verre*

Ern *entre à D* Vlâ, dj'ai fini m'tournèye !... Tins, vos stez co là, vous facteur ?... Quand dj'sus parti, vos rintrîz chez l'visin d'in face !... I m'chène qu'i vos a falu longtemps pou i doner s'gazète, mi !

Mau *faussement* C'è-st-in viè ome tout seû !... Ca i fait plaisi d'causer n'miète ave mi.

Ern Èyè d'bwère in coup !... I paraît qu'il a toudis n'boutèye de goute deûsus l'tâbe !

Lec Ca deut vos rap'ler l'bon temps, quand on payeut co lès pensions d'su place !

Mau *ravi de se souvenir* Ah l'djou dès pensions !... C'èsteut n'rude djournèye !

Lec On saveut quand èle cominçeut, mais on n'saveut jamais quand èle aleut fini !

Mau A l'posse, on nos a toudis dit d'iète agrèyâbe ave lès clients... " Droci, vos n'èstez né aus contributions" qu'i nos d'seut l'pèrcèpteûr !

Lec *le ton va monter* I m'chène què vos avîz in drole de pèrcèpteûr, mi !

Mau Né pus drole què vous !

Lec R'wètez come vos causez, hin, porteû d'gazètes !

Mau Djè n'ai né peu d'vous, savez, f'jeûs d'imbaras !

Mim *entre à G* Què c'qu'i s'passe, hon, droçi ?... Qui c'qui criye insi ?

Clé *avec malice* C'est l'controleûr èyè l'facteur qui discut'tè pou sawè l'quél dès deûs cousse èl' pus tchèr à s'patron !

Mim Ah bon !... Et mi qui crwèyeus qu'on s'diputeut !... Ah Ernest, vos stez r'venu !... Ca a dalé ?

Ern En'vos tracassez né, tout 'st-in-orde !

Mim Tant mieus !...Djè pinse qu'insi, nos stons fin prêt' pou d'min !

Scène 6 : Clément, Lecompte, Ernest, Mimy, Lily, Michou, Maurice

Lil *entre à D suivie de Michou. Elle porte une robe de couleur vive, très bariolée*
Et bé, qu'in d'sez ?...

Mim Djè sus télémint stomakîye què djè n'sais né qwè dire !

Mau C'n'est né pourtant l'momint du carnaval !
Lil Oh vous, djè m'pas'rai d'vos comentaires !... Et vous, messieû Lecompte, qu'in pinsez ?
Lec Mi ?... Bè c'è-st-à dire què...Djè vos trouve candjîye !
Lil C'est tout c'què vos trouvez à dire ?... Dj'ai chu lès consèyes dè Michou !...
Mich Vos alez fé in maleûr dèmin à l'inaugurâçion, m'pètte pouyète !
Mim Franchemint, djè trouve qu'èle vos va bé !... Djè sus binaise què vos candje enfin vos vièyès-abitudes !
Clé *avec malice* C'è-st-ène vrai révoluçion !... Djè propose qu'on fièsse ça en buvant in bon p'tit vère !... Et après, si vos volez, nos f'rons saquants brochètes !
Mim Djè veus bé, mais n'comptez né sur mi pou lès-aprèster !... Dj'ai bran.mint coureu audjourdû, djè n'ai pus inviye d'travayî !
Lil Et mi, i n'est né quèstion què dj'fasse dè tatches su m'nouvèle robe !
Ern Gn'a n'soluçion !... C'est lès-omes qui vont s'ocuper d'tout !
Clé Hein ?
Lec Il èst fou !
Mich Mais oui, mès p'tits chéris !... C'est gai, djè vos assure !... A m'maison, djè m'fais dè p'tites gât'riyes tous lès djous.
Clé I faureut n'saqwè ave lès brochètes !
Lec Ene saqwè qui n'est né compliqué !
Ern Qui n'fait né bran.mint d'vaissèle !
Mau Ene ratatouye à cabuts !
Lil Avez d'djà vu qu'on mindjeus dè cabuts ave dè brochètes, vous ?
Clé Què dirîz d'ène salade dè laitue ?
Mim Djè n'd'ai pwins !... I faureut daler d'ach'ter ieune !
Mau Né lè pène, i d'a dins m'djardin !... Djè va daler in qué ieune ! *Sort à D*
Clé Eyè l'viande ?... Qui c'qui va s'd'ocuper ?
Mich Mi djè veus bé daler dire bondjou à Dédé !... Et en min.me temps, djè pas'rai à m'maison aprèster n'salade dè pwèvrons ! *Sort à D*
Ern Pindant ç'temps-là, djè va ach'ter du p'tit bos pou fé l'feu... *Sort à D*
Clé Et vous, Achille, què dalez fé ?
Lec Djè mindj'rai lès brochètes !
Clé Sacré p'tit malin !... Vos avez co tiré à plan pou n'ré fé !
Lec Pou travayî aus contribuçions, faut iète roublard !
Clé Vènez, Mimy, nos irons aprèster l'vaissèle !
Mim Si djè n'ai q'ça à fé, djè veus bé... *sortent à G*

Scène 7 : Lily, Lecompte

restent un moment sans rien dire, chacun dans son coin, se tournant le dos, un peu gênés tous les deux...

Lil Et bé v'là !...
Lec Et bé v'là !...
Lil I fait tchaud !

Lec I fait tchaud !
 Lil C'est normal, nos stons à l'esté !
 Lec C'est normal, nos stons à l'esté !
 Lil *se retourne* Disez, messieû Lecompte !
 Lec *se retourne* Disez, mam'zèle Lily !
 Lil Vos n'saurîz né dire ôte chouse què d'répéter c'què dj'dis ?
 Lec Vos n'saurîz né dire ôte chouse... Siè !... Djè vos trouve djoliye !
 Lil *se retourne* Non !... N'disez né ça si rade !...
 Lec Mais d'aboûrd, què volez què dj'dise ?
 Lil Djè n'sais né, mi...
 Lec *se retourne* Mi non pus !...
 Lil Oh messieû Lecompte !... Come vos savez causer aus feumes !
 Lec Bé non djustemint, djè n'ai jamais seu !
 Lil Et bé d'aboûrd, èn'disez pus ré !... Aprochez
 Lec Què dj'aproche ?... *ils se rapprochent, dos tourné l'un à l'autre*
 Lil Co pus près !
 Lec Co pus près ?
 Lil Donez-m' vos min !
 Lec Djè vos done èm'min !... *toujours dos tourné, ils se donnent la main et ressentent une secousse. Ils poussent un grand Aah !*
 Lil On direut q'dj'ai atrapé n'drine !
 Lec C'èsteut bé du deûs mille volts !...
 Lil Vos avez r'sinti l'min.me què mi, messieû Lecompte ?
 Lec Ap'lez-m'Achille, mam'zèle Lily !
 Lil Ap'lez-m'Lily, messieû Achille ! *Ils se retournent*
 Lec Djè vos wès voltî !... *pose un genou par terre* Eyè vous, èm'wèyez voltî ?
 Lil Oh oui !... Oh oui !...
 Lec *se relevant, honteux* Mais què c'què dj'dis là, mi !
 Lil *gênée aussi* Mais què c'qu'i m'prind ?
 Lec Scusez-m', savez Lily, djè n'voleus né dire tout ça !
 Lil Scusez-m', savez Achille, djè n'aveus né l'intençion d'mau fé !
 Lec Oh mais vos n'm'avez né fait mau !
 Lil Ah mais vous non pus !
 Lec *admirant sa robe* C'est vrai q'vos stez djolîye insi !
 Lil Ca vos plait bé ?
 Lec Ca vos radjon.ni !... Et ça vos rind pus atirante !
 Lil Vos m'trouvez sexy ?
 Lec Faut né ègsagérer !... Djè n'mè pèrmèt'reus né d'vos dire ça !... Eyè mi, comint m'trouvez ?
 Lil Ah bé djè poureus vos trouver bia ètout... si dj'n'aveus né mès contribuçions à payî !
 Lec En'vos tracassez né, djè va arindjî ça !
 Lil C'est vrai, Achille ?
 Lec Tout c'qu'i gn'a d'pus vrai, Lily !
 Lil Oh Achille !... Mètnant, vos m'plaisez bé ! *Ils vont s'embrasser, mais...*

Scène 8 : Lily, Lecompte, Mimy, Clément

- Clé *entrent à G* V'là, lès tabes sont prêtes ... Oh pardon, nos vos dèrindjons ?
- Lec Non fait !... Né l'mwins du monde !
- Lil Nos discutines contribuçons !... Dj'èsteus in route à marchander n'forte réduccion !
- Mim C'èst vrai, ça, messieû Lecompte ?
- Lec C'è-st-à dire què...
- Clé Vos vos avez l'yé amadouwer ?
- Lec Bé !... *sort à G en courant* Djè va vire si lès tâbes sont bé mises !
- Lil *le suit* Ratindez, djè va ave vous !
- Mim Dj'ai l'idèye qu'is s'intind'tè bran.mint mieus mètnant !
- Clé C'èst n'miète come nous !... Gn'a d'jà longtemps qu'on n's'a pus disputé !
- Mim I va falwèr' qu'on s'i r'mète !
- Clé Nè l'disez né en riant... Dj'ai n'saqwè à vos dire qui n'vos f'ra né plaisi !
- Mim Ah oui ?... Qwè ?
- Clé Djè m'ai disputé ave messieû Julien !... I steut mwès q'vos n'i-avîz né causé d'l'inaugurâcion d'vos colèccion... Djè i-ai dit qu'i n'aveut né à s'méler d'vos affaires !
- Mim Mais enfin, Clément, pouqwè avez dit ça ?
- Clé Ca n'mè plait né qu'i tourne toudis alintour dè vous !... Et quèq'fwès in coup, c'èst pou vos dire dè min'triyes su m'dos !... Et djè d'ai pou huit djous à mindjî dè l'grogne !
- Mim *plaisantant* Et vos n'wèyez né voltî l'grogne ?
- Clé En'riez né !... Djè n'peus pus l'suporter !
- Mim Djè n'peus né tout d'min.me èl foute à l'uche !... Mais djè va i-in causer...
- Clé Mimy, djè sus tél'mint binaise dè vos-awè r'trouvé !
- Mim Mi ètout, djè sus binaise !... Mais dj'ai peu... pac'què gn'a cinq ans...
- Clé C'èst du passé !... N'in causons pus !
- Lec *entre à G* Vos avez roublé n'saqwè su lès tâbes !... Ave qwè c'qu'on va stchorde sès deugts ?
- Mim Djè n'ai pwins mis d'sèrviètes ?
- Lec Hé non !... Vos avîz seûremint l'amour à l'tchèsse !... *sort à G*
- Mim Alez rademint r'wèti à ça... Su ç'temps-là, djè va ap'ler messieû Julien !
- Clé Dj'i va rademint ! *Sort à G*

Scène 9 : Mimy, Julien

- Mim *téléphone à Julien* Bondjou messieû Julien... Aurîz bé cinq minutes pou monter djus'qu'à ci ?
- Jul Dj'arive !... Pourtant, djè n'sais né si dj'deûs co vos fé plaisi !
- Mim Vènez rademint, dj'ai n'saqwè à vos dire.
- Jul C'èst bon, dj'arive !

Mim *fait quelques pas en pensant à ce qu'elle va dire* Comint c'què dj'va m'i prinde ?... En douçeûr ?... Ave autorité ?... Et puis tant pis, djè va iète franche ave li !... Djè creus q'ça vaut mieus !

Jul *entre à D sans sonner* I gn'a ré qui va mau, dj'espère !

Mim N'euchîz né peu !... Dj'ai simplemint n'mise au pwins à fé ave vous !... Pindant longtemps, vos avez sté n'sorte dè grand frère pour mi... Mais mètnant, i m'chène què ça a candjé... Vos stez dè v'nu pus sètche, pus méchant min.me quèq'fwès in coup... Vos alez djustiqu'à survèyî tout c'què dj'fais.

Jul Faut dire què vous ètout, vos avez candjé !

Mim Oui, c'èst vrai !... Surtout dèpuis q'Clément èst r'vènu !

Jul Oh ç-tila !...

Mim C-tila, come vos d'sez, vos nè l'wèyez né voltî !... Mais mi siè !... Fouîrt voltî min.me !

Jul Méfiez-vous d'li !... Iun d'cès djous, i vos lèy'ra co tchèyi !

Mim Dj'ai confiance à li èt djè sus grande assez pou sawè c'què dj'fais !... Dj'ai sté maleûrèuse longtemps, lèyez-m'profiter du boneûr què dj'ai r'trouvé !

Jul Djè vos aurai prév'nu !

Mim Dj'ai bé rèyussi dins lès affaires... Mètnant, djè veus iète libe... Libe dè vire voltî, libe dè mèz mouv'mints... sans chuve-cul toudis padri mi !

Jul Dj'ai compris !... Djè n'ai pus ré à fé droci !

Mim Djè n'vos mèz né à l'uche... Vos povez v'ni quand vos volez... mais pus pou dire du mau dè djins !

Jul *va pour sortir à D, se retourne* Vos lè r'grèt'rez ! *Sort à D*

Mim Tout compte fait, ça vaut petète mieus insi !... *sort à G*

Scène 10 : Ernest, Maurice, André, Clément, Mimy, Lily, Michou, Lecompte

Ern *entre à D suivi de Maurice et André* V'là nos-i èstons !... C'n'èst né ré quand i faut monter trwès-étâdjès à pièd... surtout quand i fait tchaud !

Mau En'vos plindez né toudis insi, va !... Què dirîz si vos d'vî fé m'tournèye !

And Et si vos d'vîz d'meurer rassèré toute èle djournèye dins l'boutch'riye !

Mau Oui mais vous, quand vos avez trop tchaud, i vos sufi d'ouvri l'porte du frigo !

And Ah mais mi djè n'ai né dèz âmes charitâbes pou m'rafraichi ...

Mau Què volez dire ave ça ?

And Djè n'veus ré dire, djè dis c'què dj'dis!

Ern T't-à-l'eûre, i nos dira què c'èst pou sèrvices rindus qu'on i done à bwère !

Mau Parfaitemint messieû !

Lec *entre à G* Eyè qwè, on s'dispute roci ?

Ern Bé c'èst Maurice !

Mau Comint c'èst Maurice ?... C'èst vous qui m'cache misère en d'sant...

Lec C'èst bon, insi !... Avez tout c'qui nos faut ?

Ern Dj'ai trouvé du fin bos...

Mau Eyè mi n'bèle salade !

And Djè chwèsi l'meyeu viande pou fé lès brochètes !

Ern Vos feume n'est né v'nuye ave vous ?

And Non !... Djè i-ai dit q'dj'aleus à n'rèunion du fotbal !

Mau Djè i dirai q'ça n'est né vrai !

And Si vos f'jez ça, djè vos coupe en rondèles come du saucisson !

Lec Atinçion Maurice !... Vaut mieus in facteûr rond qu'in facteûr en rondèles !

Mau Et ave l'controleûr dès contribuçons, vos f'rez dès vitoulèts !... Vos n'aurez né grand chouse, mais ça sintira tout d'min.me èl pourcha !

Lil *entre à G* Eyè qwè, èc'què ça avance ?... I m'chène qu'on tchafiye bran.mint èt qu'on n'travaye wère !

Ern Toutes lès comiçons sont faites !

Lil Vous, vos avez dit q'vos cuirîz lès brochètes !... Alez aprèster l'feu !... Et portez tout ça à l'cuisine ! *Il sort à G* Bondjou André !... Comint m'trouvez ?

And Vos stez toute candjîye !... Toute radjon.nîye !... Toute... enfin vos m'plaisez bé !... Si djè n'èsteus né marié !

Lec Oui mais vos l'èstez !... Alors c'est bon insi !

Clé *entre à G avec Mimy* Djè wès q'tout l'monde èst là !

Lec I manque Michou !... Mais come djè n'aime né lès pwèvrans, ça n'est né grave !... Et puis, ça n'est né q'dj'ai fim, c'est putot seu q'dj'aureus !

Mim Ah mais ça, i suffit dè d'mander à Ernest dè chèvi l'apéritif !

Clé Dj'è va i-dire ! *Sort à G*

Lec I va co bé seûr reuquyî !...

Mich *sonne et entre à D* Dj'èspère què djè n'vos ai né fait ratinde trop longtemps... Djè nè r'trouveus pus mè scou... *il sort un tablier humoristique et efféminé...*

Clé *entre à G avec Ernest* V'là l'apéritif !... Alez Ernest, faijez l'sèvice !

Mich Mi djè n'suporte né l'alcol... Alors djè va travayî !

Clé Atindez, Michou !... Tant q'nos stons là tèrtous, dj'ai trouvé in carnèt...

Mau C'è-st-à mi !... *regardant de plus près* Ah non, l'mé c'è-st-in roudje !

And C'n'est né à mi non pus... Em'carnèt d'comandes èst bran.mint pus grand q'ça !

Clé *à Ernest qui sort à G sur la pointe des pieds...* Eyè vous, Ernest ?

Ern Djé va qué lès boutèyes pou rimpli lès vères !

Mim El nom du propriétaire èst bé seûr dèdins ! *Elle prend le carnet et lit...* Non, djè n'wès ré... Ah roci !... L'ours èn'mè plait né !... Ele soris blanche à l'air pus sote què sâdje !... Ele pantère a agné l'bèdot !... *rend le carnet à Clément*

Lec Ca r'chène à dès mèsâdjjes secrèts ! *Ernest entre à G et remplit les verres en tremblant*

Clé *avec intention* Merci Ernest... Si l'gâte mindje èle pantère, el lion n'aura né seu !

Ern Euh !... Non !...

Mim *sans intention* Merci Ernest !... Em'vère èsteut vude, mètnant il èst rimpli !

Ern Euh !... Oui !...

Lil Qu'avez, hon Ernest, i m'chène què vos stez tout drole !

Ern Euh !... Non !...

Clé Vos n'aurîz né l'yé trin.ner in carnèt, quèq'fwès ?

Ern Euh !... Non !... Siè !... C'è-st-à-mi !

Mim Vos f'jez partiye d'in-armèye secrète ?... Vos nos èspionez ?

Ern Non !... C'est pus simpe què ça !... Djè n'ai jamais réyussi dins m'viye !... Alors, pou m'doner d'l'importance, djè m'ai invinté in-istwère !... Djè su-st-in ajent secrèt qui deut infiltrer lès djins importants pou dèsmoli c'qu'is ont bâti !

Clé Et vos vous avez présinté come mèskène pou pouvwèr vos-instaler roci !

Mim Et què comptez fé, mètnant ?

Ern L'assaut final èst prévu pou d'min !... Djè deûs saboter l'présintâçion de l'colèççion. Mais n'euchîz né peu, come djè n'sus bon à ré, dj'aureus raté ça ètout !

Lil C'est ça lès mèsâdjes dins l'carnèt !

Ern Djè f'jeus chènance de lès téléphoner au quartier général...Dj'aveus l'imprèssion d'iète in-ome important !

Clé Et què comptez fé, mètnant ?

Ern M'in-daler avant qu'on n'mè foute à l'uche !

Mim Qui c'qui vous a causé d'vos foute à l'uche ?

Lil Si on vous fout à l'uche, nos n'aurons co pus pwins d'mèskène !

Mim Vos sèrvice èst toudis bé fait... Vos povez d'meurer.

Clé A condiçion q'vous nos splique lès codes què vous utilisîz !

Ern Vous avîz chacun vos nom... *à Lily* Vous, c'èsteut l'gâte !...

Lil El gâte ?... Et pouqwè, hon, s'i vous plait !

Ern Pac'qu'ène gâte n'arète né d'mindjî... Et vous non quand d'j'su-st-arivé !

Lil Ene gâte !... Mi qui pinseus awè d'djà tout intindu !

Lec Venez d'lè mi, m'pètite gâte !... Si vous volez, djè s'rai vos bouc !

Ern Non, vous vous stez l'lion !... Pac'què vous avez foncé sur l'eye come in lion su s'victime !...

Lil Eyè l'victime, c'èsteut mi !... Em'pètit lion adoré !...

Mim Et mi, comint c'què vous m'ap'lîz ?

Ern Vous, c'èsteut l'pantère !... Vos bousculez tout su vos passâdje, vous courez toudis mais dins l'fond, vous stez bé djintiye !

Mim Ele comparaison n'èst né mau !...

Ern *à Clément* Vous, vous stîz l'bèdot !... Vous stez dous come in bèdot mais vous sukez d'temps en temps !

Clé Et bé vous alez vire èc'què vous n'avez jamais vu !... In bèdot qui rabrasse ène pantère ! *Ils le font*

Mich Tout ça c'èst bé !... On passe ès'temps à s'rabrassî, mais mi dj'ai fim !... Si ça continue, on n'mindj'ra jamais audjourdû !...

Ern Ah oui, djè roubleus !... Vous, c'èsteut l'soris blanche !... Pac'qu'ène soris, on n'sait jamais vire du premî coup si c'è-st-in mâle ou bé n'femèle ! *Éclat de rire général sauf Michou*

Rideau